

摘藻堂四庫全書薈要

集部

欽定四庫全書薈要

集部

臨川文集卷九十

五至
七

詳校官助教

臣

常循



欽定四庫全書薈要卷一萬四千七百八十三

集部

臨川文集卷九十五

宋 王安石 撰

墓誌

比部員外郎陳君墓誌銘

吏部侍郎句公墓誌銘

工部郎中傅公墓誌銘

員外郎郭公墓誌銘

刑部侍郎王公墓誌銘



員外郎馬君墓誌銘

海陵縣主簿許君墓誌銘

縣令陳君墓誌銘

比部員外郎陳君墓誌銘

陳晉公有子五人其一人今宰相是也公晉公之中子而今宰相弟晉公諱某事始卒在史官公諱某字某九歲用晉公恩守祕書省校書郎晉公薨恩改太常寺奉禮郎服除久之會封禪恩改大理評事監鳳翔府酒稅

又會祀汾陰改衛尉寺丞歸以最升知邵武之邵武縣
獻文章得試學士院宰相才之議與科名公固辭親在
願得進官職也不願得科名從之通判秀州改大理寺
丞歸又獻文章表乞治劇郡得淮陽軍改太子中舍今
上即位恩改殿中丞是歲賜緋衣銀魚知臨江軍還得
睦州薦者數人天子以公名屬審官又徙知遂州以齊
國太夫人疾辭還改虞部員外郎上便宜數事得引對
因自贊天子欲稍進用之而遭齊國太夫人之喪以去

居無何睦州人王稷上書斥公赦前數事服除猶坐是
監虔州稅明道元年恩改比部員外郎通判建州改駕
部用舉者徙知吉州坐法免起為比部監泗州糧料又
坐法免起為虞部監饒州錢監復得比部歸羈居京師
久之乃出監江陰軍酒稅道疾病上書自言先臣恕得
幸先皇帝至大臣階先臣以得仕屢進所學蒙記識方
壯少時頗汲汲欲自奮收一日之效以卒事陛下而孤
行單立無黨友之助又薄命不幸數遭小人以見困蹶

負先臣餘教辱陛下器使之恩今老矣念終無以報盛
德深自媿恥夙夜憂畏以故得疾病且死無田園以歸
無强有力子弟以養唯男一人世昌去年為進士得嘉
慶院解臣兄在中書奏不得試禮部今當為遠官去臣
旁遠甚陛下憐之幸聽臣分司改世昌蘇常間一官以
卒養臣天地之賜也臣誠窮即不自言誰當為臣言者
書入未報竟卒於江寧得年若干時某年月也夫人某
氏子男兩人世昌泉之晉江主簿次世長前死女兩人

皆已嫁主簿將以某年月日葬公某處葬有日使來乞
銘初公為臨江軍先君為之佐其後二十五年某得主
簿於淮南而兄事之仍世有好義不可以辭無銘也公
名臣子少壯得美仕間以文藝自進意自以為且貴富
世其家而遭平世概以文法持臣下故其材不得有所
肆而卒以齟齬窮其感激怨懟往往見於文辭主簿離
其藁為二十卷讀之知其心之所存也而其求分司語
尤悲因掇其大概而存之噫其亦可悲也夫銘曰

於此有木焉一本而中分其材均樹之時又均或斷而
焚或剖以為犧尊誰令然耶其偶然耶吾又何嗟

贈尚書吏部侍郎句公墓誌銘

公句氏諱希仲字衮臣景德六年以開封浚儀進士起
家歷選於吏部為揚州江都主簿洪州新建縣尉權管
句洪州奉新縣事開封府右軍巡判官其後除於審官
為監黃州岐亭鎮茶鹽酒稅監虔州稅知洪州分寧縣
知容州句當在京左右廂店宅務知高郵軍知岳安袁

吉筠五州又其後除於中書為知隨州又遂以疾求分
司西京而以皇祐三年四月丁亥卒於安州之傳舍享
年七十一散官至朝奉郎職事官至光祿卿勲至上柱
國賜緋魚袋公通訓詁工篆隸書能傳其父學又善為
詩其在高郵歲大饑以便宜振救所活萬餘人在鄂州
前吏以逃戶諸稅責鄰人至或無桑矣而猶責其絲公
歎曰上恩及於無告而州縣若此壅之可也即奏除之
在吉州州素多事公至則御之以簡奸吏惡民顧不得

有為至相戒而去公奉寡嫂畜孤兄子尤篤於恩禮自
為郎中先任其兄子次及諸從最後乃蔭公子兄外孫
尹構幼失父母公收教之再舉進士禮部矣顧言以構
名聞構由此補郊社齋郎蓋其為人敦厚長者詳於施
人而畧於養已如此句氏其先京兆人公曾祖諱同章
始遷成都之華陽祖諱令宣皇贈光祿寺丞父諱中正
為孟氏武泰軍節度使掌書記太宗時自潞州錄事參
軍召拜著作佐郎直史館其後改直昭文在兩館二十

六年同館事多去為將相而公修職守道未嘗為之少
屈以尚書屯田郎中卒於真宗之初而葬浚儀浚儀今
祥符也故公卒以某年某月某甲子葬公開封之開封
縣保安鄉永寧村公元配清河張氏繼配楚丘邊氏祥
符劉氏劉氏封延安郡君三男子諱尚書屯田員外郎
說早世請太廟室長女子九人嫁尚書駕部員外郎王
正己湖州德清縣令郭真卿尚書虞部郎中楊定殿中
丞劉偁榮州錄事參軍張道古起居舍人鍾鼎臣殿中

丞杜師益泰寧軍節度推官謝京登州司理參軍王勗
及公之葬也以公子諱故張夫人追封仙遊縣太君邊
夫人追封仙源縣太君劉夫人追封仁壽郡太君而公
亦贈官至尚書吏部侍郎銘曰

句宗華陽世實京兆來家東都公考有廟溫溫句公有
美有相不銜不求卒為圭璋考翼在上公丞在下為此
幽宮亦浚之野

山南東道節度推官贈尚書工部郎中傅公

墓誌銘

公姓傅氏諱立字伯禮其先大名內黃人今鄆須城人也慶厯二年以五舉進士得同三禮出身主鄭州管城縣簿用舉者為滑州靈河縣令遭母夫人喪喪除以山南東道節度推官知磁州昭德縣事嘉祐四年七月六日卒於官舍享年六十六公以文行有聲於鄉其志氣甚大既久困不遂因不復有仕意鄉人強之乃起佐管城所為問義理如何不肯有所顧計貝州妖人為亂吏

坐不察者衆州縣懲艾有以妖告者輒又致之刑辟或
誣浮屠道人為妖州捕之急公辯其無罪即釋之在昭德
縣人治河堤摠役者妄怒以立威諸縣畏其紕劾莫敢
校及笞公縣人公奪之縱去縣人感悅不督而功自倍
摠役者亦不敢復犯公所部其施於政者多如此故其
卒老稚相扶攜祭哭思慕久之不怠蓋公孝慈忠信剛
毅有守遇事不為可愧其仁心尤至既病亟呼其季子
告曰吾嘗質田於鄆數十口賴以活者三十年今田主

往往而在汝兄仕於朝所不足者非財可以券還之於是長子方官於莫州及歸遭喪終以田歸主如公戒公曾祖諱凝贈尚書庫部員外郎祖諱世隆尚書戶部員外郎知邛州父諱珏右班殿直凡三世皆以經學舉至公始為進士而公子亦皆為進士曰堯俞尚書兵部員外郎曰舜俞郊社齋郎曰君俞未仕餘四人皆早死兵部君以才德為世名人嘗為諫官以言事不合辭知雜御史不肯就以熙寧二年十月某日葬公於孟州濟源

縣清廉鄉美化里以夫人長壽縣太君王氏祔於是公
贈官至尚書工部郎中太君有賢行方兵部除知雜御
史也適北使未返而親故皆賀夫人弗受治裝為行及
兵部歸而果辭不就以出也銘曰

惟傳厥先相武丁告功皇天上比星公躬服仁世守經
奮發華藻揚芬馨宜殖福祿引厥齡摧藏沉淹以溺湮
齎志弗獲終冥冥爰有美子集帝庭忠功孝名神所聽
卜瑩高原日永寧

尚書度支員外郎郭公墓誌銘

公諱維字仲逸少好學有大志年二十五起為秦州司理調泰真二州判官以能聞監真州之酒稅丁母憂服除改著作佐郎知南豐縣俗喜訟令始至豪猾輒構事入縣察令能否公至即得其妄窮而從之由此無敢犯法改新都縣又以治稱既去民思之相與繪公像祠焉使者薦其材就知雅州王蒙正姻明肅太后家侵民田幾至百家有訴者更數獄無敢直其事詔公治之其行

也人為公憚公至則拔根擿節不漏毫末以田歸民蒙
正坐除名既歸天子目之賜之朱衣得尚書屯田員外
郎知常州至州索宿姦數人流之州以無事移提點淮
南刑獄吏不治道聞公至往往豫以事求解部中肅然
遷度支以卒慶歷二年正月也凡仕二十七年公剛毅
能斷當事勇不自恤繇景德祥符之間四海平治寬文
法待吏而吏乃相習為遨嬉浮沉者或按一吏則交議
羣詆以為暴刻生事日浸月積而民敝於下矣至公始

按吏而獨急於權倖有大臣出揚不治曲以禮事公公
奏斥不報既代猶斥之以是被按一無憾言以聲威聞
而所至即有惠愛某嘗羈遊過常里中民有以褻語相
罵者其長者怒曰爾欲忘郭屯田邪蓋公在常以此法
其民時卒已九年矣猶不忘之惜乎朝廷方欲顯用而
公已不幸其出於治者猶未足以盡其志故不悉書特
掇其一二而存之此足以見公之志也祖某不仕父某
贈殿中丞母劉氏仙源縣太君妻張氏南陽縣君子男

三人先正烏江縣尉聰正舉進士祥正星子主簿女六
人以某年月日葬公於某處公之里也將葬先正等以
今司封員外郎趙誠書來乞銘先人與公祥符八年以
進士起而公子且與某遊有好也銘不敢讓銘曰

翼翼汾陽子儀始王德完道粹功蓋於唐宜享世澤流
如海長原原南寓孰嗣而昌公生而明剛簡自徇拔身
貧羈誼不辱進蘇窮斥姦惠立威振而年不長志不時
盡既奮既材天奚弗慙刻銘在幽來者之感

贈尚書刑部侍郎王公墓誌銘

江陵縣有合葬龍山之西者為宋龍川令贈尚書刑部侍郎王公之墓公之卒得年七十一其葬之歲在辛卯為皇祐三年十二月甲申龍川其所卒也以刑部侍郎贈公者曰公之子光祿卿周公諱文亮字昭遠其先晉丞相導也丞相十有六世之孫儉為唐正議大夫刺明州始去長安之萬年為明之奉化人大夫之兄曰潔潔生紳紳生韶韶生公四世咸為縣令方錢氏之王吳越

也公嘗試策入等為其屬州之掾國除選於京師復掾
密州尉夔奉節為邢之任令舉者二十餘人不用歎曰
吾既其衰矣而為是是不可以已耶即以疾去去之八
年無復言進仕黨故強起之復歎曰仕不仕惟義也吾
敢自必於其間耶起令龍川遂卒始公尚少以文稱於
士友嘗度浙江有忘白金百斤於舟公最後獨見之留
三日得忘者歸之而後去而不告以名佗日從者以為
言於是又稱其長者今兩縣吏民皆曰賢令也既亡皆

哀馬合葬于龍山者天水郡太君權氏善草隸書誦數
經能略通其說實唐貞孝公皐之十七世孫云子男四
人向頻高為進士充其業其季光祿君也女三人皆歸
聞人光祿君方潔勤審下賢好學人以為君子之子焉
自晉之亂而戎夷盜賊穴有中國且亂且治至于今歲
千年士大夫之家流落顛頓不常其世後雖有振起者
多不知其族之所出獨光祿君之家為世其家而能自
道尤詳自大夫伯仲至公四世之告命皆具在命其宗

人之子某銘公之墓者光祿君也銘曰

公先籍秦系相導大夫相孫維作守兄淥遂留家海浦
子紳孫韶公祖考于東四傳弗甚耀藏仁厥家以賚後
後蕃而昌其必效今卿追公為之兆

兵部員外郎馬君墓誌銘

馬君諱遵字仲塗世家饒州之樂平舉進士自禮部至
於廷書其等皆第一守祕書省校書郎知洪州之奉新
縣移知康州當是時天子更置大臣欲有所為求才能

之士以察諸路而君自大理寺丞除太子中允福建路轉運判官以憂不赴憂除知開封縣為江淮荆湖兩浙制置發運判官於是君為太常博士朝廷方尊寵其使事以監六路乃以君為監察御史又以為殿中侍御史遂為副使已而還之臺以為言事御史至則彈宰相之為不法者宰相用此罷而君亦以此出知宣州至宣州一日移京東路轉運使又還臺為右司諫知諫院又為尚書禮部員外郎兼侍御史知雜事同判流內銓數言

時政多聽用始君讀書即以文辭辯麗稱天下及出仕
所至號為辨治論議條鬯人反覆之而不能窮平居頽
然若與人無所諧及遇事有所建則必得其所守開封
常以權豪請託不可治客至有所請君輒善遇之無所
拒客退視其事一斷以法居久之人知君之不可以私
屬也縣遂無事及為諫官御史又能如此於是士大夫
歎曰馬君之智蓋能時其柔剛以有為也嘉祐二年君
以疾求罷職以出至五六乃以為尚書吏部員外郎直

龍圖閣猶不許其出某月某甲子君卒年四十七天子以其子某官某為某官又官其兄子持國某官夫人某縣君鄭氏以某年某月某甲子葬君信州之弋陽縣歸仁鄉裏沙之原君故與予善予嘗愛其智略以為今士大夫多不能如惜其不得盡用亦其不幸早世不終於貴富也然世方懲尚賢任智之弊而操成法以一天下之士則君雖壽考且終於貴富其所畜亦豈能盡用哉嗚呼可悲也已既葬夫人與其家人謀而使持國來以

請曰願有紀也使君為死而不朽乃為之論次而繫之以辭曰

歸以才能兮又予以時投之遠塗兮使驟而馳前無禦者兮後有推之忽稅不駕兮其然奚為哀哀莞婦兮孰慰其思墓門有石兮書以余辭

泰州海陵縣主簿許君墓誌銘

君諱平字秉之姓許氏余嘗譜其世家所謂今泰州海陵縣主簿者也君既與兄元相友愛稱天下而自少卓

犖不羈善辨說與其兄俱以智略為當世大人所器寶
元時朝廷開方略之選以招天下異能之士而陝西大
帥范文正公鄭文肅公爭以君所為書以薦於是得召
試為太廟齋郎已而選泰州海陵縣主簿貴人多薦君
有大才可試以事不宜棄之州縣君亦常慨然自許欲
有所為然終不得一用其智能以卒噫其可哀也已士
固有離世異俗獨行其意罵譏笑侮困辱而不悔彼皆
無衆人之求而有所待於後世者也其齟齬固宜若夫

智謀功名之士窺時俯仰以赴勢物之會而輒不遇者
乃亦不可勝數辯足以移萬物而窮於用說之時謀足
以奪三軍而辱於右武之國此又何說哉嗟乎彼有所
待而不悔者其知之矣君年五十九以嘉祐某年某月
某甲子葬真州之揚子縣甘露鄉某所之原夫人李氏
子男瓌不仕璋真州司戶參軍琦太廟齋郎琳進士女
子五人已嫁二人進士周奉先泰州泰興縣令陶舜元
銘曰

有拔而起之莫擠而止之嗚呼許君而已於斯誰或使之

漢陽軍漢川縣令陳君墓誌銘

陳君之墓在某州某縣某鄉某所之原以某年某月某甲子葬陳君者諱之祥字某家某州之某縣其業進士其中等以皇祐二年其官滁州全椒縣主簿漢陽軍漢川縣令其為人強於學果於行能使為之長者聽為之民者思其卒年三十二有一男一女皆出夫人李氏其

葬臨川王某為之銘

芒乎既壯而能充忽乎奚去而誰從歸形幽陰兮窆土
以為宮聚封其上兮為記無窮

臨川文集卷九十五

欽定四庫全書薈要卷一萬四千七百八十四集部

臨川文集卷九十六

宋 王安石 撰

墓誌

亡兄王常甫墓誌銘

王公墓誌銘

胡君墓誌銘

員外郎邵君墓誌銘

馬漢臣墓誌銘

主簿蕭君墓誌銘

祕書丞謝師宰墓誌銘

郎中周公墓誌銘

侍禁周君墓誌銘

叅軍周君墓誌銘

員外郎周君墓誌銘

郎中晁君墓誌銘

郎中葛公墓誌銘

亡兄王常甫墓誌銘

先生七歲好學毅然不苟戲笑讀書二十年當慶厯中
天子以書賜州縣大置學先生學完行高江淮間州爭
欲以為師所留輒以詩書禮易春秋授弟子慕聞來者
往往千餘里磨礱淬濯成就其器不可勝數而先生始
以進士下科補宣州司戶至三月轉運使以監江寧府
鹽院又三月卒又七月葬則卒之明年四月也實皇祐
四年墓在先君東南五步先君姓王氏諱益官世行治

既有銘先生其長子諱安仁字常甫年三十七生兩女
嗚呼先生之道德蓄於身而施於家不博見於天下文
章名於世持以應世之須爾大志所欲論著蓋未出也
而世之工言能使不朽者又知先生莫能深嗚呼先生
之所存其卒於無傳耶始先生常以為功與名不足懷
蓋亦有命焉君子之學盡其性而已然則先生之無傳
蓋不憾也雖然先生孝友最隆委百世之重而無所屬
以傳有母有弟方壯而奪之使不得相處以久先生尚

有知其無窮憂矣嗚呼以往而推存痛其有已耶痛其有已耶先生有文十五卷其弟既次以藏其家又次行治藏於墓嗚呼酷矣極矣銘止矣其能使先生傳耶

主客郎中知興元王公墓誌銘

公王氏諱某字某其先著望太原而公之曾大考諱某考諱某皆葬撫州之臨川縣公少力學以孝悌稱於鄉里既壯起進士為漢州軍事推官至則以材任劇在上者交舉之遷大理寺丞知大名府大名縣就除通判忻

州又通判真定府府帥王嗣宗恃氣侮折其屬為不法以故久之莫敢為通判者公行嗣宗固不懌稍侵公以氣公恬然不為校也以禮示之而已嗣宗訕服居十餘日公請視獄獄中繫者常數百人嗣宗意愠輒久之不問吏亦不敢言治公視獄所當者數十人而已餘悉當釋無所坐於是嗣宗趣有司如公指即日斷出之自是事無不聽公所為公賴分別可否而使其政皆由嗣宗以出雖府人或不知公於嗣宗日有助也一府遂治而

士以此稱公為長者始公中進士時同進有常陵公者
嫉公先以被酒取公勅牒裂燒之公為諱其事以失亡
告有司而已及後陵公者為屬吏公舉遷之或非公以
德報怨公曰受詔舉京官彼今為吾屬而任京官吾則
舉之何報怨之謂哉且吾與彼乃未始有怨也蓋公之
行已多如此居一歲移知保州又以舉者移知深州又
以選移知齊州二州之人皆曰公愛我已而提點刑獄
淮南兼勸農事公於為獄務在寬民而以課田桑為急

按渠陂之故誘民作而修之利田至萬九十頃天子賜書獎諭後出氏名付大臣召用而當是時丁謂為宰相先是謂以二人屬公善視之曰皆能吏也至則皆有罪公發其狀以聞由此謂欲傷公不果而久之公所任吏亦有贓坐即絀公監池州順安鎮酒稅會今上即位移滁州又移知興元府自丁謂得罪徙南方論者皆以公宜復用而公亦且得疾不起矣享年六十二官至尚書主客郎中明年天聖七年葬和州之歷陽縣後若干年公

夫人張氏葬而公墓墊乃改卜合葬於真州楊子縣萬
寧鄉銅山之原公子六人於是存者二人曰某為殿中
丞曰某為進士其四人皆已卒曰某開封士曹叅軍曰
某楚州寶應縣主簿曰某曰某為進士而公以殿中君
積贈官至右諫議大夫某公兄孫也受命於叔父而為
銘銘而次公之行事不能詳者以不得事公而公之沒
叔父皆尚少故也嗚呼於公之行事雖不得其詳而其
略所聞如是蓋可以考公德矣銘曰

王亡晉封遠跡南土公始有廟安其禰祖孰強而勝孰
忌以爭予予恭寬在室而亨疑疑之節因時乃發曰黜
予咎匪仇予過避善不名亦不隕聞寘銘新基維以長
存

胡君墓誌銘

王某之治鄞三月其故人胡舜元凶服立於門揖入問
弔故則喪其父五月留而館意獨怪其來之早也居數
月語吾弟曰吾釋父之殯跋山浮江從子之兄于海旁

願有謁也久矣不敢以言吾親之生我學於四方不得所欲以養今已不幸卒也得子之兄誌而銘之藏之墓中可以顯於今世以傳於後雖吾小人與榮焉無悔焉不知子之兄可不可吾弟以告予歎曰審如是可以為孝君子固成人之孝而吾與之又舊其何顧而辭耶取吾所素知者為之誌而銘之誌曰君諱某池之銅陵人生於丁丑興國之年也卒於丁亥是為慶厯七年子七人某以十月葬君於谷垂山胡氏世大家闔門數百人

君有子舜元獨招里先生教之為士其卒也族分而貲
衰舜元為善士銘曰

壽七十一不為不多吾與之銘千古不磨

屯田員外郎邵君墓誌銘

邵公既國燕其子孫處者猶食其初邑至後世遂為邵
氏今有田里丹陽者獨為大家其所出往往稱天下君
丹陽人也諱某字某少敏爽皇考某欲大就之為破貲
聚留師賓以發其材及壯行內修不標飾為名而有譽

於為士者年四十始以進士出佐鎮東軍積功次入尚書為屯田員外郎通判亳州遭母夫人某氏喪不行以卒君工為詩歌喜飲酒與人交恬如也尤不好官爵至京師一不問權貴人所舍事有類君者自言得遷或勸君自言終不許然起家十九年更三縣以材奏君者甚衆卒之明年皇祐某年某月弟某葬君某所以夫人某氏祔子男兩人曰某曰某一女子尚幼銘曰

乘於朝葬於里廐嬪祔之祭則子以完歸親維有祉

馬漢臣墓誌銘

合肥人馬仲舒字漢臣其先茂陵人父臯為江東撥發
寘其家金陵漢臣因入學齒諸生為人喜酒色其相語
以褻私侈為主父母不欲之又隆愛之不能逆其意以
教也然漢臣亦踈金錢急人險艱不自顧計於衆中尤
慕近予予亦識其可教以禮法開之果大寤遂自挫刻
務以入禮法從予學作進士既數月其辭章粲然充其
科者也漢臣長予四年予兄弟視之漢臣視予則師弟

子如也嘗助予叔父之喪若子姓然慶歷六年漢臣冠
五年矣從予入京師待進士舉六月病死死時予亦病
其叔父在京師因得棺斂歸金陵殯之某年某月乃葬
於某處孔子曰秀而不實者有矣夫漢臣幾是矣噫誌
其墓云

贛縣主簿蕭君墓誌銘

君諱化基字子固實蕭氏其先有自長沙避地廬陵者
曰霽方李氏有江南為洪之武寧令於君為曾大父其

後再世曰煥曰良輔皆不仕至君之兄侍御史定基始以材起為名家而追贈其皇考尚書工部員外郎君於工部為少子少謹厚能自力業其世以善富既御史貴得任子弟君猶私其能不願治民然御史竟官君為明之奉化尉主簿於虔之贛縣監真州酒恬慎祇修在勢者任之春秋六十二至和元年四月癸酉以官卒其子汝霖汝能汝為汝正護其柩歸以十一月壬午葬其縣之儒行鄉白沙原夫人楊氏前葬矣今不祔先人於御

史以弟交君子丈人行也二父皆有子知名南方交於
予以故請銘銘者所以名前人而燕孝子之心也於是
為銘銘曰

韓矣肅宗楚產之良繩繩主簿有善其鄉我修不苟
為康圖銘壙石維後之藏

缺

秘書丞謝師宰墓誌銘

君姓謝氏諱景平字師宰尚書兵部員外郎知制誥陽
夏公贈禮部尚書諱絳之子太子賓客陳留公贈禮部

尚書諱濤之孫泰寧君掌書記贈尚書吏部侍郎諱崇
禮之曾孫初以祖父廕試秘書省校書郎守將作監主
簿既而中進士第僉書崇信軍節度判官廳公事監楚
州西河轉般倉累官至秘書丞年三十三以治平元年
十二月庚申卒妻尹氏生男女四人皆前死其兄以某
年某月某日葬君鄧州穰縣五隴山南謝氏故家河南
緱氏君六世祖仕吳越故自陳留公以上三世葬杭之
富陽至君始葬陽夏公於鄧為穰人而今以君祔葬君

於忿不忮於欲不求雖學之力亦其天性故其孝弟忠
信寬柔遜讓莊靜謹潔稱於兒童以至壯長而成不充
其志施不盡其材此學士大夫所以哀其死而多為之
出涕也然君文學政事言語已能自達於一時其於道
德之意性命之理則求之而不至聞矣而不疑嗚呼可
謂賢已銘曰

陽夏四子皆賢而材季也早死吾銘其埋今又銘叔嗚
呼可哀古之死者以死為息嗟叔方剛何愒之亟昭昭

者逝疑疑者藏為識在斯銘則不亡

尚書刑部郎中周公墓誌銘

周氏其先自華陰入蜀蜀孟氏時公之皇考諱敬述以文章知名嘗至要官任事矣孟氏亡因不復仕而天子召以為壽州下蔡令由下蔡以為太子中允知江州賜紫衣金魚使撫初附之民其後為祕書丞知泰州以卒而得州之北原以葬有子四人其卒皆位於朝而公第二公諱嘉正字幹之少與其弟弟俱以進士甲科起家

為通州軍事推官其後通判廣州提點福建刑獄知壽
州為三司鹽鐵判官故宰相丁謂慮其材天子以為河
北轉運使而公不就已而謂得罪公坐出知金州又知
海州又知濠州而以工部郎中分司南京歸治疾于海
陵之第明道元年以恩遷刑部二年年六十四以卒公
寬厚而廉清而其才尤長於政事自為推官時已能有
所建易為士民所記及奉使福建獄有冤輒辨有疑若
可貸輒以聞所活至數十人而其治大抵遇姦吏為獨

急子男五人曰象先今為武康軍節度推官監台州稅
曰彥先為右侍禁知循州興寧縣曰茂先為泰州司法
叅軍曰行先為山南東道節度推官知江州彭澤縣曰
嗣先為進士女七人皆嫁為士大夫妻嘉祐三年三月
壬申公子與孫葬公皇考祕書丞贈尚書工部侍郎之
兆東以安喜縣君錢氏祔縣君實左右公以有家者也
銘曰

周遷于蜀爰自先人考有四子發于海濱公有令聞貴

維次子歸寬民人施刻在己方飛方騫方缺于天既鍛
以歸既隕于泉有高其後有缺其前作為銘詩兆此新
阡

右侍禁周君墓誌銘

君周氏諱彥先字師古曾大父諱瓌贈大理評事大父
諱述祕書丞贈尚書工部侍郎考諱嘉正尚書刑部郎
中君少以郎中君蔭補三班奉職監泗州浮橋又監楚
州船場為揚泰州巡檢而近臣薦君閤門祗候大臣曰

周某可用矣然吾將試之邊乃白以為羸莫等七州軍
沿邊巡檢邊人兩界上為羣盜君得姓名以白安撫使
移之契丹契丹悉捕斬之自是久之邊無盜也已而君
上書言漕事又言邊將使人耕邊以給公使不即禁止
往往能生事於是邊將大怒而君所部卒有犯法者因
詆君以不詰坐是監廣州清遠縣鹽場轉運使留君以
監市舶它吏方習為姦賕事而君獨不買舶中一物轉
運使嘗數稱君以媿它吏而薦君以知循州之興寧縣

至則相縣南三十里寧昌驛以為治所而吏自此得不
以瘴死然君既得疾於興寧矣遂卒卒時年四十二縣
人以君為能撫我思之也君先夫人盛氏尚書工部侍
郎諱京之子後夫人王氏尚書主客郎中諱貫之子
皆有賢行五子濤洵洧渥澥皆為進士二女子嫁如臯
史堪德安鄭汾亦皆為進士而濤今為著作佐郎知汝
州梁縣以嘉祐三年三月壬申葬君皇考郎中之兆次
而以先夫人祔臨川王某為銘曰

君弟吾嫂夫人吾姑君能有家不失疾徐治兵與民威
愛之孚銘昭子孫以告不誣

秦州司法叅軍周君墓誌銘

君周氏諱茂先字去華其先成都人至君大父諱述為
秘書丞知秦州以卒始葬秦州之北原而子孫遂為州
人不去父諱嘉正尚書刑部郎中君以父蔭為楚州司
戶叅軍又為秦州司法叅軍皆有能名明道二年五月
刑部君終于第君思慕哭泣至其年十月亦卒於是君

年三十二夫人南陽張氏守其孤不嫁其后孤渙以進士起家洪州南昌縣主簿二女子嫁池州貴池縣尉宣城查塾進士建安吳觀而以嘉祐三年三月壬申葬君北原之兆銘曰

綿綿之孤屬于單妻既恃而殖龜錫告命曰維孝子從先人宅

尚書屯田員外郎周君墓誌銘

君周姓諱濤字幾道中慶歷六年進士甲科歷亳州觀

察推官撫州軍事推官著作佐郎祕書丞太常博士尚書屯田員外郎知汝州梁杭州錢塘二縣內行敏能為政壹自急飭視民疾如在己不肯釋事實為名聲要利所在民愛譽甚於士大夫治平三年六月在京師授簽書梓州判官事七月十三日以官卒年四十有四曾祖諱述故郾人皇祕書丞贈工部侍郎始占海陵以葬祖諱嘉正皇刑部郎中父諱彥先終右侍禁贈右監門衛將軍妻曰昭德縣君錢氏子男五人稭種扶穆稭以其

年十月十六日葬君揚州江都縣同軌南鄉東武里銘
曰

於勢與聲躡循弗爭無忌其生於善與恥操終如始有
哀其死

虞部郎中晁君墓誌銘

尚書虞部郎中晁君諱仲參字孝先以治平四年五月
九日卒於通判舒州事其子以熙寧二年正月二十九
日卜濟州任城縣諫議鄉呂村之原以葬狀君之行來

乞銘掇其語為銘曰

晁望潁川衛有卿丙錯以術用作漢家令魏晉南北史
無傳人良正官唐仍不大振開封于家徙鉅野縣辟時
難屯出宋而顯迴奮布衣太子太師宗慤秉政父子一
時三朝四世錫榮丘墓佺令中書為君曾祖有子迪者
刑部侍郎乃生宗簡世德孔揚使京東西郎于刑部君
實其嗣少則多譽仲父保任主簿上虞宰墨蘊政易君
仕初從容調聃史莫玩法墨以廉終弱仲強懾按察擾

獄夙如我謀君不為奪械囚于州將范文正歎愛而謂
畏宜繩私公勇勿畏君願持此畢身無尤薦監越酒旋
宅父憂判官于滁擢丞大理汝州郟城來知縣事富姓
賕吏寓田勢家役煩且窘中戶愁嗟君哀偽券應手即
辨完蠹噓枯俗戒以勸秦王諸孫上冢入郭卒榜驛隸
君擒而誅將劾中人匿車夜遁移內侍省罪令即訊迄
明年至徒御無譁能聲震越號稱其家易曹濟陰太子
贊善督尉索盜里閭宴衍馬入罷牧地租于民厨傳費

劇輸之殆貧君曰閔哉責豈無豫操書鐫守多絀其數
遷官博士去領開州大築學校率衣冠游溫湯之鹽實
不酬課歲蠲五萬奏自君可氓疾不治謁巫代鑿教以
餌藥盡投詭祠失怙恃者予其娶嫁坐堂朝晡飲酒閒
暇英宗纂極員外于虞比駕二部閱最而除今天子恩
始正郎位攝舒朞年條教逾肆殍來鄰邦賑使無僵扶
携飽去又遺之種敦於除害未始愛力取縱陽河避羅
剎石析池口征合于銅陵官不失筭舟無危行人幸是

為曠數十載趨令驩呼無有稚艾孤山馬當歲漂百航
鑿秋口浦直走雷江脫險風濤幾五百里章隨驛聞就
付其事方冬告役君夏而徂壽五十五識者歎吁齊公
孫氏作配甚似封永康君誕惟四子端仁端義端禮端
智仁中進士常州司理義郊社郎餘則未仕五女四人
歸為士妻石端侯彥侯歸而嫠范胡二壻純粹僧孺幼
處于家君孫有五男節符錢其二則女惟君平生外晦
內明忤出不意默無與爭祿賙族婣恩稱疏戚庖無朝

炊笑語如昔晚尤靜曠病不告遺極談性命方絕之時
子丐埋辭衰麗走汴掇其緒餘以質幽竈

度支郎中葛公墓誌銘

葛公姓也源名也宗聖字也處州之麗水公所生也明
州之鄞後所遷也貫魯大考也遇大考也旺累贈都官
郎中考也進士公所起也洪州左司理叅軍吉州太和
縣主簿江州德化縣令監興國茶場威武軍節度推官
知廣州四會縣著作佐郎知開封府雍丘縣祕書丞知

泉州同安縣太常博士通判建州屯田員外郎知慶成

軍都官員外郎知南劔州司封員外郎祠部郎中江浙

荆湖福建廣南提點銀銅坑冶鑄錢度支部中荆湖北

提點刑獄此公之所閱官也州將之甥與異母兄毆人

而甥殺之州將脅公曰兩人者皆吾甥而殺人者乃其

兄也我知之彼大姓也無為有司所誤不然此獄也將

必覆公劾不為變此公之為司理叅軍也州符徙吉水

行令事他日令始至大猾吏輒誘民數百訟庭下設變

詐以動令如此數日令厭事則事常在吏矣公至立訟者兩廡下取其狀視有如吏所為者使自書所訴不能書者吏授之往往不能如狀窮輒曰我不知為此乃某吏教我所為也悉捕劾致之法訟以故少吏亦終不得其意毛氏寡婦告其子以恩義說之不得即使人徵捕得之與閒語者驗其對乃書寡婦告者也窮治具服為私謀誣其子孫距州溪水惡而歲租幾千萬碩舟善敗民以輸為愁公始議縣置倉以受輸則官漕之亦便州

不聽公論之不已倉成至今賴其利此公之為主簿也
中貴人擊驛吏取所給過家以言府府不敢劾公曰中
貴人何憚為吾民而有陵之者吾亦恥之上書論其事
中貴人坐絀此公之為縣於雍丘也屬吏常有隙於公
同進者因讒之公察其旨不聽以為舉首此公之為州
於南劔也鑄錢歲十六萬其所施置後以為法程此公
之為銀銅坑冶鑄錢也鄂州崇陽大姓與人妻謀而殺
其夫州受賕出之公使再劾劾者又受賕獄如初而公

終以為不直其弟訴之轉運使雖他在事者亦莫不以
為冤復置之獄卒得其姦跡狀論如法此公之為提點
刑獄也甲子四百三十五公所享年也至和元年六月
乙未卒之年月日也潤州之丹徒縣長樂鄉顯陽村公
所葬也嘉祐元年十月壬申葬之年月日也鄉邑孫氏
今祔以葬者公元配也萬年縣君范陽盧氏公繼配也
良肱良佐良嗣公子也妻太常博士黃知良曰金華縣
君公女也起進士為越州餘姚縣尉主公之喪而請銘

以葬者良嗣也論次其所得於良嗣而為之銘者臨川
王某也銘曰

士竅以養交兮弛官之不思維公之所至兮樂職嗜事
彼能顯聞兮公則不斲不銘示後兮孰勸為瘁

臨川文集卷九十六

欽定四庫全書薈要卷一萬四千七百八十五

集部

臨川文集卷九十七

宋 王安石 撰

墓誌

王逢原墓誌銘

司封郎中孫公墓誌銘

郎中劉君墓誌銘

運使李君墓誌銘

博士致仕李君墓誌銘

成固縣楊君墓誌銘

致仕周公墓誌銘

張常勝墓誌銘

王逢原墓誌銘

嗚呼道之不明邪豈特教之不至也士亦有罪焉嗚呼
道之不行邪豈特化之不至也士亦有罪焉蓋無常產
而有常心者古之所謂士也士誠有常心以操聖人之
說而力行之則道雖不明乎天下必明於已道雖不行

於天下必行於妻子內有以明於已外有以行於妻子
則其言行必不孤立於天下矣此孔子孟子伯夷柳下
惠揚雄之徒所以有功於世也嗚呼以予之昏弱不肖
固亦士之有罪者而得友焉余友字逢原諱令姓王氏
廣陵人也始予愛其文章而得其所以言中予愛其節
行而得其所以行卒予得其所以言浩浩乎其將公而
不窮也得其所以行超超乎其將追而不至也於是慨
然歎以為可以任世之重而有功於天下者將在於此

余將友之而不得也嗚呼今弃予而死矣悲夫逢原左
武衛大將軍諱奉謹之曾孫大理評事諱珙之孫而鄭
州管城縣主簿諱世倫之子五歲而孤二十八而卒卒
之九十三日嘉祐四年九月丙申葬於常州武進縣南
鄉薛村之原夫人吳氏亦有賢行於是方娠也未知其
子之男女銘曰

壽胡不多天實爾嗇曰天不相胡厚爾德厚也培之嗇
也推之樂以不罷不怨以疑嗚呼天民將在于茲

宋尚書司封郎中孫公墓誌銘

公諱錫字昌齡曾祖釗祖易從父再榮皆弗仕及公仕
贈其父至尚書兵部侍郎公以天聖二年進士起家和
州歷陽無為巢二縣主簿部使者及兩制以御扎舉者
十餘人改鎮江軍節度推官知杭州仁和縣籍取兇惡
戒以不改必窮極案治而治其餘一以仁恕故縣人畏
愛之以兵部喪去三年乃用舉者以集慶軍節度掌書
記克國子監直講豫校史記前後漢書南北史脩集韻

選蘇王宮伴讀教導有法宗室召燕飲未嘗往居頃之
改著作佐郎當罷矣又留為國子監丞講讀七年乃用
舉者召試集賢校理同知太常禮院判吏部南曹登聞
鼓院為開封府推官賜緋魚坐考鑠廳進士舉籍中有
不中格者兩人降監和州清酒務當是時龐宰相為樞
密使薦宜侍講禁中方召而公以謫去久之會明堂恩
召還同判尚書刑部先時主者多持事往決於中書公
獨視法如何不往戎州人向吉等操兵賈販恃其衆所

過不輸物稅州縣捕逐皆散走成都鈐轄司奏請不以
南郊赦除其罪從之逮捕親屬繫獄至更兩赦有詣闕
訴者刑部詳覆官以為特勅遇赦不原者雖數赦猶論
如法公獨奏釋之凡釋百二十三人公於議法多如此
復為開封府推官當隨尹奏事仁宗問大辟幾何且以
慎刑愛人為戒公因奏開封勅有重於編勅而當改者
數事仁宗皆以為然它日問尹以公姓名稱之於是貴
戚女使有奏讞上薄其罪付公監決曰此人平恕可任

也道士趙清貺出入龐宰相家受賕御史以劾龐府治
實清貺自為龐不知也清貺坐杖配沙門島行兩日死
御史又劾府希宰相指故杖清貺殺之滅口仁宗亦疑
乃悉罷知府推判官而以公知太平州初清貺事獨判
官王礪劾決公不自辨也未幾仁宗即寤罷者皆復而
以公提點淮南路刑獄在淮南二年所活大辟十三人
考課為天下第一所舉多善士未嘗聽人請屬還為三
司戶部判官求知宣州許之特詔秩祿視轉運使至則

召五縣令約以州所下書有不便封還故縣得自為政而州無事且滿州人詣轉運使提點刑獄乞畱還又知舒州發常平廣惠倉以活陳許潁蔡流人及歸計口量遠近給食遣去去者率錢買香焚之府門以祝公至或感泣初提點刑獄恐聚流人為盜又惜常平廣惠倉數牒止公不聽申以手書又不聽佐屬皆爭曰不可公行之自若比代去州人闔城門畱之薄暮與爭門乃得出遂以告老致仕於是官至尚書度支郎中散官至朝奉

郎勲至上柱國今上即位遷司封賜金紫以熙寧元年正月十二日卒年七十八孫氏世為廣陵富姓兵部兄弟五人其季婦有子寡欲分財以義譬解不得乃悉推田宅與諸兄弟脫身携公居建安軍揚子故今為真州人諸兄弟後破產而兵部居揚子又卒為富姓為公千里迎師立學舍市書至六七千卷公感勵奮激誦習忘寢食年十九舉進士開封第二坐同保匿服罷而再舉又第一當是時以文學稱天下及仕號為忠厚正直終

身未嘗言利老而貧不以為悔鄉人尤歸其長者有文集二十卷初娶莊氏早卒又娶裴氏刁氏刁氏封壽安

縣君亦前死子湜澄泳澗淑湘早卒湊太廟齋郎後公數月死澄楚州實應主簿洙祕書丞集賢校理漸太廟齋郎女十人一人嫁三人未嫁三人嫁而卒三人未嫁而卒九月十六日葬公揚子縣懷民鄉北原銘曰

於戲孫公有直其道為之少時以濟壯老人信公行承趨薦保天順公德與公壽考維公有子喪事哀祇慰其

考思用此銘詩

荆湖北路轉運判官尚書屯田郎中劉君墓

誌銘并序

治平元年五月六日荆湖北路轉運判官尚書屯田郎
中劉君年五十四以官卒三年卜十月某日葬真州揚
子縣蜀岡而子洙以武寧章望之狀來求銘噫余故人
也為序而銘焉序曰君諱牧字先之其先杭州臨安縣
人君曾大父諱彥琛為吳越王將有功刺衢州葬西安

於是劉氏又為西安人當太宗時嘗求諸有功於吳越者錄其後而君大父諱仁祚辭以疾及君父諱知禮又不仕而鄉人稱為君子後以君故贈官至尚書職方郎中君少則明敏年十六求舉進士不中曰有司豈枉我哉乃多買書閉戶治之及再舉遂為舉首起家饒州軍事推官與州將爭公事為所擠幾不免及後將范文正公至君大喜曰此吾師也遂以為師文正公亦數稱君勉以學君論議仁恕急人之窮於財物無所顧計凡以

慕文正公故也弋陽富人為客所誣將抵死君得實以告文正公未甚信然以君故使吏雜治之居數日富人得不死文正公由此愈知君任以事歲終將舉京官君以讓其同官有親而老者文正公為歎息許之曰吾不可以不成君之善及文正公安撫河東乃始舉君可治劇於是君為兗州觀察推官又學春秋於孫復與石介為友州旱蝗奏便宜十餘事其一事請通登萊鹽商至今以為賴改大理寺丞知大名府館陶縣中貴人隨契

丹使往來多擾縣君視遇有理人吏以無所苦先是多盜君用其黨推逐有發輒得後遂無為盜者詔集強壯刺其手為義勇多惶怖不知所為欲走君諭以詔意為言利害皆就刺欣然曰劉君不吾欺也留守稱其能雖府事往往咨君計策用舉者通判廣信軍以親老不行通判建州當是時今河陽宰相富公以樞密副使使河北奏君掌機宜文字保州兵士為亂富公請君撫視君自長垣乘驛至其城下以三日會富公罷出君乃之建州

方并屬縣諸里均其徭役人大喜而遭職方君喪以去
通判青州又以母夫人喪罷又通判廬州朝廷弛茶權
以君使江西議均其稅蓋期年而後反客曰平生聞君
敏而敢為今濡滯若此何故也君笑曰是固君之所能
易也而我則不能且是役也朝廷豈以為它亦曰愛人
而已今不深知其利害而苟簡以成之君雖以吾為敏
而人必有不勝其弊者及奏事皆聽人果便之除廣南
西路轉運判官於是修險阨募丁壯以減戍卒徙倉便

輸考攝官功次絕其行賕居二年凡利害無所不興廢
乃移荆湖北路至踰月卒家貧無以為喪自棺槨諸物
皆荆南士人為具君娶江氏生五男二女男曰洙沂汶
為進士洙以君故試將作監主簿餘尚幼初君為范富
二公所知一時士大夫爭譽其才君亦慨然自以當得
意已而屯邇流落抑沒於庸人之中幾老矣乃稍出為
世用若將有以為也而既死此愛君者所為恨惜然士
之赫赫為世所願者可睹矣以君始終得喪相除亦何

負彼之有哉銘曰

嗟乎劉君宜壽而顯何畜之久而施之淺雖或止之亦
或使之唯其有命故止於斯

廣西轉運使李君墓誌銘

并序

君諱寬字伯強姓李氏其先隴西人後移光山至君六
世祖又移建安今為南昌人者以君大皇考為鼻祖君
皇考諱某以太子洗馬致仕終尚書虞部郎中其贈官
至衛尉卿大皇考諱某以殿中丞致仕其贈官至吏部

尚書曾大皇考諱某當五代之亂無爵祿以尚書故贈
大理評事君始以世父蔭守將作監主簿監洪州鹽院
用歲課倍得知袁州宜春縣改知福州福清縣當是時
能聞朝廷矣就除通判桂州又通判江州二州皆治遂
知吉州請於天子立學以教學者常三百人施方略捕
盜賊無衆寡遠近必得以至米鹽酒榷皆為除弊致利
移衡州不赴改江州州人曰是嘗泣我矣不待至而服
未幾移潤州不赴改信州又不赴改太平州轉運使言

饒大劇州將不能治而太平不足用君乃換饒州屬縣惡吏聞且至有弃其官而去至則禁巫醫之罔民案畜蠱者遂以無事安撫使言治行於江南為第一母夫人終去位三年知虔州將行三司請君制置糧草河北一歲減緡錢八十七萬由此提點江浙等路鑄錢坑冶以衛尉老奏徙治所南昌從之移提點荆湖北刑獄辭不往又請便官以養乃改江西居一月遭衛尉喪服除久之尚不忍去墓所詔就起君提點江東刑獄又移京西

除廣西轉運使自儂智高反宿軍邕州歲漕不足乃多
治船設賞罰而邕軍食以有餘所部攝官以三十四員
為額待攝常數十百人一員闕皆爭賕吏君第其課為
三等有闕以次補攝官不賕吏由此始二廣使者故不
以春夏出會有詔閱邊卒君即出道遇瘴歸卒年六十
治平二年九月二十三日也初李氏既居江南尚書未
老致其事歸養其子侍郎以分司歸亦未老當侍郎之
歸衛尉又以從其兄弗仕仍世德義為南人所慕君既

生有美質而積習名教自為兒童侍衛尉側不惰終日
及壯砥礪以材能自顯其於吏治精壯果敏機張鍵閉
姦不可知目所指取必得其情狀故所在豪人猾吏重
手累足以終君去不敢有所觸君視遇其屬士大夫賢
者尤謹所拔舉過百人後多知名云夫人胡氏仁和縣
君子男五人長曰承勉宣州旌德縣令早卒次曰亞夫
太廟齋郎曰獻夫試將作監主簿曰渭夫試祕書省校
書郎曰太平奴方晬而天女二人長適蘇州常熟縣主

簿余公弼次適大理寺丞田真卿孫男三人君與弟尚
書司門郎中定相友愛尤篤遺奏以司門之子簡夫聞
詔除司門知太平州補簡夫郊社齋郎又詔君喪所過
州發卒護送以明年二月歸殯于洪州某月某日葬新
建縣桃花鄉曹山去先墓五里君所自為壽藏也君積
散官至朝奉郎職事官至尚書金部郎中勲至護軍賜
服佩至三品銘曰

李姓章浦自君考祖弃閩徂遷望此荆楚君於治人無

有黨讎部我千里如農一丘
薶姦鉏彊以殖善柔均之
利澤深時平糴乃登祿實尚饋春秋君能孝祀君則多
子有來無窮其視章水

國子博士致仕李君墓誌銘

朝奉郎國子博士致仕騎都尉賜緋魚袋廣陵李君者
諱問字某以數舉進士賜同學究出身嘗為韶州樂昌
無為軍廬江二縣主簿河中府臨晉縣令以昭德軍節
度推官知邢州平鄉縣以大理寺丞知蘇州吳江衢州

江山二縣又以太子中舍殿中丞監在京箔場太平州
蕪湖縣酒稅遂告老會今上即位遷博士至明年而卒
又明年十二月二十五日葬廣陵某鄉某里君善為詩
當時名人柳開王禹偁稱之少貧幾不自存有姊氏以
田宅弗取也及為吏所在推誠愛人人至不忍有所負
以累君去輒遮泣挽留及老矣而彌貧然終不以貧故
變節有所取年九十精悍如此及將卒尚讀書與家人
笑語自若投其書若將寐者遂卒卒時治平元年十一

月十一日也李氏故金陵人其後遷高郵又遷廣陵君
曾祖諱某祖諱某考諱某以君故贈殿中丞君娶開封
浩氏有两男子察山南東道節度推官蚤卒定集慶軍
節度推官一女嫁杭州新城縣令許仲蔚定有文行從
余遊故與為銘銘曰

斬曠平窾幽密工相方史諏日於惟君考此室猶其永
寧尚終吉

朝奉郎守殿中丞前知興元府成固縣楊君

墓誌銘

楊氏自太尉震守節於漢以死而將相名臣之族多出
於華陰歷八九百年以至於今不絕為士大夫家而尚
能譜太尉之昭穆當五代之亂君曾祖諱某者在吳越
因相其王王遷國除於太宗之時而國相之子孫歸仕
於天子又多賢顯尚書刑部郎中諱某者君皇祖也尚
書司封郎中諱某者君皇考也楊氏之為江都人者自
君皇考始君諱某字公適幼詳敏知好文學故我叔祖

興元府君嫁之以其子及長而仕號為能吏所在官治多舉者自太廟齋郎更九官而以殿中丞知興元府成固縣事治平元年歸得疾於楚州二月二十一日卒年六十五夫人王氏即興元府君尚書主客郎中諱某之女五男子湜洙治滌淳湜宿州符離縣尉餘皆進士洙治前死四女子其已嫁者二人太常少卿呂琦試將作監主簿孫縉者君壻也其一人未嫁而前死諸子孫以二年十一月四日葬君江都東興鄉之北原以某嘗得

侍君而君知之於少時者也故屬以銘銘曰

赫赫太尉窮于季世華陰之楊終煽而昌艱難徂遷亦
相其王王以家朝相隨內屬有子有姓尚多顯服君勸
厥紹考終世祿書銘在京兆實初卜

都官郎中致仕周公墓誌銘

尚書都官郎中南康周公卒之明年皇祐五年葬某所
子蘊詠使請銘次其語曰公諱某字某其先占蔡之汝
陽唐末遇亂於光蘄遷江州之星子鎮太平興國中以

鎮為縣又以為南康軍故今為南康人焉曾大父某大父某當李氏時皆以學行為處士家皇考某累贈尚書職方郎中始以進士起至尚書屯田郎中求監池之永豐監遂致仕已而今天子大享明堂恩除都官于家以卒嘗令岳之沅江壽之霍丘池之建德邛之依政河南之洛陽凡五縣通判池州守二州曰蓬曰安其治之寬嚴視事劇易尤惠於池蓬蓬人愛思至為公畫像在洛陽明肅太后使中貴人用事者來留守傾身媚附之中

人諷公請已獨拒之不往故相張士遜薦公說書國學
且諭公見執政公固謝之其篤學果行蓋有世士夫所
難者卒時春秋七十七戒喪葬無用浮屠說有文十卷
世傳之先夫人王氏封仁壽縣君二子蘊保信軍節度
推官詠太廟齋郎銘曰

余聞異時宦官之幸雖隆名尊爵有紀於時者往往為
之詘焉又觀古之士能無折身以市於貴勢蓋亦少也
信公之所守則其賢遠矣我銘公藏不刻其他惟茲之

存以勸母邪


張常勝墓誌銘

君湖州烏程縣人姓張氏名文剛字常勝好學能文孝友順祥再舉進士不第年二十七熙寧五年九月九日卒以六年二月十日葬于鳳凰山曾祖任祖維贈刑部侍郎父先尚書都官郎中致仕女三人君娶予從父妹也故君從予學銘曰

才足以貴而莫之知善足以壽而止於斯嗚呼逝矣兮

銘以哀之

臨川文集卷九十七



總校官庶吉士臣張能照

校對官檢討臣龔大萬

膳錄監生臣劉鳳樞

欽定四庫全書薈要

集部

臨川文集卷九十八至
一百



詳校官助教臣常循

欽定四庫全書薈要卷一萬四千七百八十六

集部

臨川文集卷九十八

宋 王安石 撰

墓誌

御史王公墓誌銘

孔處士墓誌銘

致仕王君墓誌銘

員外郎張君墓誌銘

謝景回墓誌銘



參軍杜君墓誌銘

金溪吳君墓誌銘

南京沈公墓誌銘

吳錄事墓誌

郡公宗辯墓誌銘

南康侯仲行墓誌銘

華陰侯仲履墓誌銘

祁國公宗述墓誌銘

將軍仲夔墓誌銘

大將軍世仍墓誌銘

尚書都官員外郎侍御史王公墓碣銘

慶厯五年天子以尚書都官員外郎通判荆南府王公
為侍御史居一年以入三司為戶部判官又一年還之
為言事御史頃之奏事殿中疾作歸翌日卒其家以不
起聞天子悼閔走中人賻之金帛又官其一子先是御
史有物故者不賻由公故乃敕有司并賻蓋天子之所

以錄其忠如此自公舉進士時已能力學自立以經術游於江淮之南為學者所歸至為許州司理參軍則以其職與強貴人抗曲直獄疑當死賴以活者至數人再主簿於杭之臨安開封之扶溝遂選開封府法曹參軍令皆不能出其治尹亦不敢侵其守而薦者以十數歲當遷府推官惡不順已持其奏不肯書欲誅公請已公故不誅推官度終無可奈何乃卒任公遷祕書省著作佐郎已而覃恩遷祕書丞乃出知洪州分寧縣入為審

刑詳議官數以疑似辨上前輒釋及佐荆南能以義憚其守錯諸不法事嘗上書論南方用師討徭蠻不如撫而降之利先是公在京師天子以災異詔百官言事公所言有以儆世者其後御史府惡老者在事不能自己以言趣之去位公以謂於老者薄非所以廣仁孝於天下且養之非其道使至於無恥而專以法格之滋所以使人薄也乃推三代禮意為養老頌以諷凡公之行已治民及所以論於上者皆出於寬厚誠恕而其言易直

以明故其召而為御史也未至而好公者已信其能稱職矣同時御史間一事皆爭言塞職其已嘗言公未嘗繼以言曰可悟上意足矣然排黨幸為獨切其言多同時御史所不能言者每承上閒言人不能無過若以古繩墨治之世殆無全人為國家用者要之忠信而已忠信雖有過尚足用也其大指所存如此嗚呼古所謂淑人君子者公於是可以當之矣公既行內修其大者為世所稱至其施於小亦皆敏而盡力顧余不得盡載也

然讀余之所載則亦槩足以知公矣公諱某字某其先
為漢雁門太守者曰澤澤後十八世雄為唐東都留守
封望太原族墓在河南而世宦學不絕為聞姓至唐之
將亡雄諸孫頗陵夷始自缺其譜亡不知幾傳而至護
始居福之候官曰本河南人雄之後也護生伸伸生廷
簡當閩王審知時被署為安遠使有勞烈於其國審知
死遂置其官以老安遠二子其季居政娶邑里姚氏女
生公自護四世至公始以文行發名追官皇考至祕書

丞而以昭德縣太君封其母夫人曾氏贈尚書兵部侍郎會之女封金華縣君婦順母嚴公所以紀其家蓋有助焉生五男子回向固同罔皆為士其文學行義有過絕人者故人莫不知公後世之將大顯以蕃而以公之仕不充其志為無憾也公年六十三以既卒之三年葬潁州之某鄉某原初公嘗過游潁之樂故諸孤御其母家焉而以公於葬至是回之友臨川王某追銘墓上實至和二年也銘曰

顯姓維王出不一宗公先河南實祖於雄來閩四世乃
挺以生其來則否其去而亨歸忠於君播惠在厖配時
前人駿發以升世不載德孰為榮名謂公有後其豈公
卿

孔處士墓誌銘

先生諱旼字寧極睦州桐廬縣尉諱詢之曾孫贈國子
博士諱延滔之孫尚書都官員外郎諱昭亮之子自都
官而上至孔子四十五世先生嘗欲舉進士已而悔曰

吾豈有不得已於此邪遂居於汝州之龍興山而上葬其親於汝汝人爭訟之不可平者不聽有司而聽先生之一言不羞犯有司之刑而以不得於先生為恥慶厯七年詔求天下行義之士而守臣以先生應詔於是朝廷賜之米帛又勅州縣除其雜賦嘉祐三年近臣多言先生有道德可用而執政度以為不肯屈除守祕書省校書郎致仕四年近臣又多以為言乃召以為國子監直講先生辭乃除守光祿寺丞致仕五年大臣有請先

生為其屬縣者於是天子以知汝州龍興縣事先生又
辭辭未聽而六月某日先生終於家年六十七大臣有
為之請命者乃特贈太常丞至七年月日弟晞葬先生
於堯山都官之兆而以夫人李氏祔李氏故大理評事
昌符之女生一女嫁為士人妻而先物故先生事父母
至孝居喪如禮遇人恂恂雖僕奴不忍以辭氣加焉衣
食與田桑有餘輒以賙其鄉里貸而後不能償者未嘗
問也未嘗疑人人亦以故不忍欺之而世之傳先生者

多異學士大夫有知而能言者蓋先生孝弟忠信無求於世足以使其鄉人畏服之如此而先生未嘗為異也先生博學尤喜易未嘗著書獨大衍一篇傳於世考其行治非有得於內其孰能致此耶當漢之東徙高守節之士而亦以故成俗故當世處士之聞獨多於後世乃至於今知名為賢而處者蓋亦無有幾人豈世之所不尚遂湮沒而無聞抑士之趨操亦有待於世邪若先生固不為有待於世而卓然自見於時豈非所謂豪傑之

士者哉其可銘也已銘曰

有入而不出以身易物有往而不反以私其佚嗚呼先生好潔而無尤匪佚之為私維志之求

右領軍衛將軍致仕王君墓誌銘

君王氏諱乙字次公其望在太原而實家大名之元城不知其始所以徙曾祖諱安當周世宗時為閣門通事舍人祖諱廷溫開寶中泰寧軍節度副使考諱奉諲右班殿直贈左武衛大將軍君嘗舉進士不中因獻其所

藏書祕閣而上書言先臣某逮許王於先皇帝有一日之幸臣實其子天子下其問驗以為三班借職累遷至內殿崇班閤門祗候淮南東路都巡檢使皇祐二年年七十三以右領軍衛將軍致仕卒於海州而以嘉祐二年葬真州之揚子縣某鄉某原以後夫人劉氏祔於是先夫人林氏既葬矣君強記博聞剛毅而聰明好讀書雖老矣讀書未嘗少止於窮人賤士苟義所在樂與之為膠漆一欲以不直加我雖嚴貴人義終不為受也數

上書言事皆中世病而用事者多不聽聽者兩言耳又
事之小者然當時蒙其利言楚州可去堰為牒歲省卒
二十一萬七千人錢一百三十萬米六萬八千石又言
河陰可以茶鹽募入穀而漕之河北為十說以排三司
之難三司不能絀其一此當時蒙其利者也宋興百年
大定於太宗至真宗內外富矣內外自是遂務以無為
養息天下朝廷所尚賢良進士而將相大臣之世用君
方慨然懷古人趨赴功業之意欲起貧賤不勢左右而

以其辯智當人主衆圓獨方用非其時卒以不合嗚呼
甚可悲也然天下不肖多畏惡君以其抗直而幸其齟
齬不得意以老獨賢者哀之耳君子越石秦州觀察判
官其次子仁傑為進士女二人嫁進士林度陳州項城
主簿宋造余嘗為君僚而與其子越石同年進士也銘
其葬曰

強能吾羸吾與之為抗羸者惴惴吾與之為讓卒羸于
強以窒于行維其心之享以實其聲也

朝奉郎尚書司封員外郎張君墓誌銘

朝奉郎尚書司封員外郎知安州軍州兼管內勸農事
騎都尉賜緋魚袋借紫張君年五十六以皇祐二年十
二月十一日卒以熙寧元年某月某日葬君諱禔字聖
休餘杭人曾祖曰浩祖曰文實弗仕考曰延遇仕至左
侍禁贈官至左驍騎將軍君少孤與其弟祗皆文行知
名以布衣教授宗室後中進士第歷宣州宣城縣主簿
撫州司法參軍用舉者遷大理寺丞知雅州名山洪州

奉新兩縣監海州榷貨務通判池廣兩州乃自尚書屯
田員外郎召拜殿中侍御史用磨勘遷侍御史劾奏殿
前都指揮使郭承祐恃恩驕嫚論官官雖高不當坐侍
燕而謫請求者又論不當禁諫官御史風聞言事仁宗
皆以為然君之為吏也數決疑獄所至稱辨治及是言
事又能舉其職方是時為御史者拔舉多不次君素寬
裕靜退恥以彈治人得用未幾即稱疾求出乃知安州
州大治會卒人追喪車慟哭初驍騎府君監湖州兵遂

葬卞山至是君從葬以夫人京兆縣君施氏祔施氏生
一子稚恭為進士一女適信州司理參軍王汶孫大正
大成大亨大鈞今尚幼君事母孝友其弟甚篤於權勢
財利能廉吏治尤可紀在廣州奏請城之未及築外郭
而召後儂智高反州人賴君所築活以不卒功為恨銘
曰

有嘉張君質靜寬徐進非所好人用稱譽視利在前蹲
循弗趨退施一州用智之餘嘻其葬矣次有銘書

謝景回墓誌銘

君姓謝氏諱景回字師復以泰寧軍節度掌書記諱崇禮者為曾大父以太子賓客陳留公諱濤者為大父而兵部員外郎知制誥陽夏公諱絳者之少子也幼好學有大志聰明卓然不類童子年十九所為文辭已可傳載於是得疾不可治以嘉祐四年十二月丙子棄世於漢東人莫不為謝氏哀之諸兄以八年十月乙酉葬君鄧州穰縣五壟原之北而臨川王某為銘曰

攻乎其為良汰乎其為精吾見其質吾聞其聲如或毀
之用不既於成哀以銘詩亦慰其兄

真州司法參軍杜君墓誌銘

真州司法京兆杜渙濟叔年三十七以皇祐四年四月
辛酉卒子男某尚穉自將以下合貨財以葬於北城之
野而留其孥以處杜氏世占永寧之博野父詢嘗厯江
寧府司錄參軍遂葬家焉有子五人濟叔最少實慶厯
六年進士臨川王某銘其葬焉銘曰

猗嗟杜氏博野之良有官于南遂宅以藏是生司法以
節自強頌而陽陽翼翼而才其生可懷死矣皆傷江之
北垣南墓在望奚葬不歸卜者曰祥後有子孫既實而
昌求藏厥初來考銘章

金溪吳君墓誌銘

君和易罕言外如其中言未嘗極人過失至論前世善
惡其國家存亡治亂成敗所繇甚可聽也嘗所讀書甚
衆尤好古而學其辭其辭又能盡其議論年四十三四

以進士試於有司而卒困於無所就其葬也以皇祐六年某月日撫州之金溪縣歸德鄉石廩之原在其舍南五里當是時君母夫人既老而子世隆世範皆尚幼三女子其一卒其二未嫁云嗚呼以君之有與夫世之貴富而名聞天下者計焉其獨歎彼耶然而不得祿以行其意以祭以養以遺其子孫以卒此其士友之所以悲也夫學者將以盡其性盡性而命可知也知命矣於君之不得意其又何悲邪銘曰

蕃君名字彥弼氏吳其先自姬出以儒起家世冕黻獨成之難幽以折厥銘維甥訂君實

太常少卿分司南京沈公墓誌銘

皇祐三年十一月庚申太常少卿分司南京錢塘沈公卒明年子披子括葬公錢塘龍居里先公尚書之兆卜十月甲戌吉與其宗謀銘則書公官壽行世來以請予論次其書曰沈氏自沈子逞以身屬社稷書於春秋文學賢勞功名不曠于史而武康之族尤獨顯於天下至

公高祖始徙去自為錢塘人大王父某當錢氏時匿不仕王父某官咸平端拱間至大理寺丞父某學行顯聞早世無爵位由長子同及公贈兵部尚書公諱周字望之少孤與其兄相踵為進士起家掾漢陽從事高郵用舉者入大理為丞監蘇州酒知簡之平泉縣縣人銘其政於石遂自封州守佐蘇州由蘇州為侍御史有以丞相指謁公者不為聽居頃之出刺潤州又刺泉州其為治取簡易訟有可已者輒諭以義使歸思之獄以故少

泉州舊多盜日暮市門盡閉禁民勿往來公至除其禁而盜亦以止佐開封訟數年不遣者以百數公斷治立盡嘗代其尹爭獄於上大臣為公自紂三司使請鑄大錢下其書議議者無敢忤公為其判官獨曰壞四錢為之可以當十民盜變舊錢且盡鑄之為誘民死耳不如無鑄議上如公言於是天子以江東之按察為已悉聞公寬厚即以為使盡歲無所劾而部亦以治稱然公已老不樂事權自請得明州明年遂以分司歸第三月卒

夫人許氏六安縣君兩男世其家一女子已嫁公廉靜
寬慎貌和而內有守春秋七十四更十三官而不一挂
於法鄉黨故舊聞其歸則喜喪哭之多哀而無一人恨
望者銘曰

公生四方卒於故里先君之從祭則孫子有櫝有松有
鬱其岡不阨不騫萬世之藏

吳錄事墓誌

君諱賁字成之世為撫州金谿人曾祖某不仕祖德筠

尚書屯田員外郎父敏尚書都官員外郎君以蔭入官
任吉州太和袁州萍鄉縣主簿尉蘄州石橋茶場廬州
司理毫壽州江寧府錄事參軍以某年月日卒于家享
年若干君事親孝友于兄弟與厭侈父母兄弟寧窮困
身妻子故老妻長子人不勝憂也義不忍貲親遺產悉
推兄弟比沒世妻子遵約鄉人賢以為難君嘗議獄上
官指教再三君弗許再三上官顧歎許舉京官君弗謝
乃終弗舉後他上官率以質直弗舉也二男子偉豪長

有志行如君二女子歸晏脩睦王令季有特操如今豪
養寡姊妹嫁孤甥夫婦孳孳鄉人又以為難卜以元豐
八年某月日葬于唐州桐栢縣淮源鄉實李祔臨川王
某誌

宋贈保慶軍節度觀察留後追封東陽郡公
宗辯墓誌銘

公諱宗辯字慎微祖諱元佐是為魏恭憲王考諱允升
太師平陽郡王諡曰恭懿公平陽第十三子生數歲而

平陽薨事母孝友于兄弟好讀書不舍晝夜嘗獻所為
文得試學士院兄弟四人皆中優等遷官而仁宗遇公
甚寵嘗親書近親才賢好文博古八字賜之公既好書
又嗜醫方所蓄方甚衆每躬自治藥以振人之疾其惻
隱不倦蓋天性也以熙寧元年七月己卯終于睦親北
宅享年四十六官至右衛大將軍金州防禦使爵天水
郡開國公食邑三千戶食實封五百戶贈保寧軍節度
觀察留後追封東陽郡公夫人李氏封德安郡君贈尚

書中書令漢瓊之孫子男十五人仲富右內率府副率
仲尋右羽林軍大將軍黎州團練使仲綰右武衛大將
軍雅州刺史仲瑋右武衛大將軍彭州刺史仲緘右千
牛衛將軍仲汧右監門率府率仲琨右內率府副率仲
富前公卒餘亦皆蚤死女子十九人嫁者四人未嫁而
死者九人餘尚幼也二年二月十七日葬河南永安縣
銘曰

猗歟賢公蕃此皇國耀其藻章以貴明德能不外勛維

家之飭厥承詵詵覬我無射如何不怡遂永寃安

贈虔州觀察使追封南康侯仲行墓誌銘

公諱仲行字德之故婺州觀察使諱宗迴之子贈節度使同中書門下平章事蔡國公諱允言之孫魏王諱元佐之曾孫母曰齊安郡君梁氏慶厯四年賜名除太子右衛率府率右監門衛大將軍爵天水郡開國侯食邑一千三百戶年二十二以治平四年八月二十九日卒贈虔州觀察使追封南康侯夫人張氏封壽昌縣君子

男士化早卒士泉右監門率府率其季與女皆尚幼君
仁而好學其卒也宗室皆憐傷其葬也以熙寧二年二
月十七日葬河南府永安縣銘曰
爵之尊祿之殖維年之卑不配德

贈華州觀察使追封華陰侯仲厖墓誌銘

公諱仲厖字子厚濮國公宗樸之子濮安懿王諱允讓
之孫魯恭靖王諱元份之曾孫也母曰蕭國夫人王氏
以皇祐元年賜名除太子右內率府副率二年改太子

右監門率府率嘉祐五年改右千牛衛將軍八年改右
監門衛大將軍治平二年領嘉州刺史四年改右武衛大
將軍領雅州團練使熙寧元年年二十四以三月三日
卒上為不視朝一日內出司賓祭弔贈華州觀察使追
封華陰侯公生而秀麗長而聰敏於宗室為好學上承
下撫無不得意故其卒哭者皆為盡哀妻馬氏封安平
縣君女一人尚幼公以熙寧二年二月十七日葬河南
府永安縣銘曰

維濮世封實承安懿公緒厥慶尚終有嗣奄其喪矣一女之存歸銘幽宮以慰公魂

贈奉寧軍節度使追封祁國公宗述墓誌銘

公諱宗述字子耆韓恭懿王諱元偓之孫而東平郡王名允弼之子也以天聖元年生以景祐元年賜名除右侍禁歷太子右司禦率府右監門衛將軍左屯衛大將軍廉州刺史隰州團練使濰州嘉州防禦使熙寧元年正月十八日以不起聞上幸其第奠哭之贈奉寧軍節

度使追封祁國公越明年二月十七日葬河南永安縣
公重厚寡笑言內行治未嘗有謫樂振施知音樂善射
尤為東平王所愛妻任氏樂安郡君子男七人仲璆仲
淑仲誘仲虺仲醕仲璆早卒兩人未名而死銘曰
維德之嘉維能之多惟命之不遐宗室之嗟

右千牛衛將軍仲夔墓誌銘

君諱仲夔字彥之曾祖諱元佐是為魏恭憲王祖諱允
言贈安遠軍節度使同中書門下平章事封密國公父

宗悅前左屯衛大將軍池州團練使祁國公君官至右
千牛衛將軍坐法廢熙寧元年年二十二以五月二十
五日卒至某年某月某日葬河南府永安縣妻郭氏有
六男子死者四人士殯今為右監門率府率一人尚幼
銘曰

託靈皇宗慶之多終以無祿傷如何棄此白日營山阿
贈右屯衛大將軍世仍墓誌銘

君諱世仍字季遷宣城郡公從審第十子宣城以越懿

王諱德昭為祖以安定郡公諱惟和為考君母曰渤海
郡夫人吳氏實山南東道節度使元扆之孫娶潘氏鄭
王美之孫也年二十二生二男子一女以熙寧元年八
月二十三日卒於是官至右千牛衛將軍制以右屯衛
大將軍告其第用二年二月十九日葬于河南府永安
縣君授尚書能通章句過人恭謹有恩然喜飲酒以故
得疾死銘曰

有昭其明有韡其榮惟其弗馮以隕其生

尺
二
〇
五
六
七
八
九

臨川文集

二十一

臨川文集卷九十八

欽定四庫全書薈要卷一萬四千七百八十七

集部

臨川文集卷九十九

宋 王安石 撰

墓誌

仙源縣太君夏侯氏墓碣

揚州進士滿夫人楊氏墓誌銘

曾公夫人萬年太君黃氏墓誌銘

太常博士楊君夫人金華縣君吳氏墓誌銘

長安縣太君王氏墓誌

永安縣太君蔣氏墓誌銘

建陽陳夫人墓誌銘

李君夫人盛氏墓誌銘

金太君徐氏墓誌銘

楚國太夫人陳氏墓誌銘

寧國縣太君樂氏墓誌銘

仙居縣太君魏氏墓誌銘

右武衛大將軍黎州刺史世岳故妻安喜縣君

李氏墓誌銘

仁壽縣君楊氏墓誌銘

仙源縣太君夏侯氏墓碣

仙源縣太君夏侯氏濟州鉅野人尚書駕部員外郎諱
晟之子翰林侍讀學士尚書戶部侍郎譙公諱嶠之孫
贈太子太師諱浦之曾孫尚書兵部員外郎知制誥知
鄧州軍州事陽夏公謝氏諱絳之夫人太常博士通判
汾州軍州事景初之母年二十三卒後五年葬杭州之

富陽於是時陽夏公為太常丞祕閣校理博士生五歲矣而其女兄一人亦幼又十五年康定二年博士舉夫人如鄧以合於陽夏侯之墓而臨川王某書其碣曰夫人以順為婦而交族親以謹以嚴為母而撫滕御以寬陽夏公之名天下莫不聞而曰吾不以家為恤六年於此者夫人之相我也故於其卒聞者欲其有後而夫人之子果以才稱於世嗚呼陽夏公之事在太史雖無刻石吾知其不朽矣若夫夫人之善不有以表之隧上

其能與公之烈相久而傳乎此博士所以屬予之意也
予讀詩惟周士大夫侯公之妃修身飭行動止以禮能
輔佐勸勉其君子而王道賴以成蓋其法度之教非一
日而其習俗不得不然也及至後世自當世所謂賢者
於其家不能以獨化而夫人卓然如此惜乎其蚤世也
顧其行治雖列之於風以為後世觀豈愧也哉

揚州進士滿夫人楊氏墓誌銘

揚州進士滿涇之夫人楊氏者著作元賓之女也年六

十有一以治平四年十月庚戌卒而以熙寧二年八月
庚申葬其墓在江都縣馬坊里之南原有子七人建中
居中執中存中方中閔中求中皆嚮學建中壽州壽春
縣令執中潁州萬壽縣令居中舉進士女二人孫男女
八人夫人性溫恭靜約事當意與否未嘗形於喜愠以
止有吾母也故思其父愈久而猶悲以不逮吾姑也故
事其舅愈勞而不懈承其夫以順勵其子以善而汎接
於族人也能以惠振其貧以慈撫其賤以恕掩其過

以篤悛其悍老矣歲時尚先諸婦以蒞祭祀蓋夫人之
性行可稱者多至如此而其子又豺狼不已以求余銘
故勉為之銘曰

滿氏有家保族衍大夫人來嬪德協内外夫喜而謂偕
我鮎背子祈以盡溫清之愛奚命之畸使棄弗逮維前
之祥德則弗諼惟後之祥有子才賢銘慰諸幽亦賁新
阡

曾公夫人萬年太君黃氏墓誌銘

夫人江寧黃氏兼侍御史知永安場諱某之子南豐曾氏贈尚書水部員外郎諱某之婦贈諫議大夫諱某之妻凡受縣君封者四蕭山江夏遂昌雒陽受縣太君封者二會稽萬年男子四女子三以慶厯四年某月日卒於撫州壽九十有二明年某月葬于南豐之某地夫人十四歲無母事永安府君至孝修家事有法二十三歲歸曾氏不及舅水部府君之養以事永安之孝事姑陳留縣君以治父母之家治夫家事姑之黨稱其所以事

姑之禮事夫與夫之黨若嚴上然眎子慈眎子之黨若
子然每自戒不處白人善否有問之曰順為正婦道也
吾勤此而已處白人善否靡靡然為聰明非婦人宜也
以此為女與婦其傳而至於沒與為女婦時弗差也故
內外親無老幼踈近無智不能尊者皆愛輩者皆附卑
者皆慕之為女婦在其前者多自歎不及後來者皆曰
可矜法也其言色在視聽則皆得所欲其離別則涕洟
不能捨有疾皆憂及喪來弔哭皆哀有餘於戲夫人之

德如是是宜有銘者銘曰

女子之德煦願愉愉教隳弗行婦妾乘夫趨為亢厲勵
之顓愚猗嗟夫人惟德之經媚于族姻柔色淑聲其究
女初不傾不盈誰疑不信來監于銘

太常博士楊君夫人金華縣君吳氏墓誌銘

并序

錢塘楊蟠將合葬其母線經以走晉陵而問銘於其守
臨川王某王某曰古者諸侯大夫有德善功烈其子孫

必為器以銘而國之人必能為之辭越國而求銘予未
之聞也今杭大州以文稱於時者蓋有而蟠也釋其殯
千里以取銘於予蓋所以嚴其親之終而欲信其善於
後世如此其慎也予豈敢孤其意以愛不腆之辭乎於
是為之序曰故太常博士知婺州東陽縣事楊君諱翺
字翰之之夫人金華縣君吳氏世為婺州之金華人自
其大父文顗始有籍於杭州之錢塘而楊君亦自其父
徵始去處州之麗水而為錢塘人而葬於錢塘之履泰

鄉龍井之原楊君之卒也年六十七以慶厯二年十二月二十一日從其先人以葬而夫人後君十六年以卒卒時嘉祐二年年七十三而以明年二月二十日祔于楊君之墓楊君少以文學中進士甲科而晚以廉靜不苟合窮於世夫人有馴德淑行協于上下內外無怨楊君有子十一人其一人則孽也夫人母其孽子猶吳氏之甥雖鄉人之習於楊君者不知為異母既楊君卒教養嫁娶皆各不失其時而子端子蟠同時以進士起家

為密和二州推官隣里歎慕以為夫人榮然夫人不為之喜也至楊君之弟子完及進士第乃喜曰吾妣老矣此亦足以慰其心也蓋其仁如此夫人生男女十人卒時子輔國子端與其女子七人皆已卒而蟠獨在為泗州軍事推官銘曰

博士有家夫人實紹博士有子夫人實教遊其門庭弦誦之聲御其堂與賓祭齋明皇命淑人維君郡縣問名考德夫人實踐歸哉萬年博士之丘銘以昭之無有春

秋

長安縣太君王氏墓誌

長安縣太君臨川王氏尚書都官員外郎贈太師中書
令兼尚書令潭國公諱益之女尚書左丞張公諱若谷
之婦尚書比部郎中諱奎之妻國子博士覲開封府雍
丘尉覲之母十四而嫁五十一而老五十六而卒其卒
在潁州子覲官舍實元豐三年正月己酉君為婦而婦
為妻而妻為母而母為姑而姑皆可譽歎莫能間毀工

詩善書強記博聞明辨敏達有過人者循循恭謹不自
高顯晚好佛書亦信踐之衣不求華食不厭蔬慈哀所
使不治小過欲歸歸之欲嫁嫁之君二女長不慧不可
以適人其季殿中丞龔原妻也卜六年葬江州德化縣
兄安石為誌如此弟安上書丹

永安縣太君蔣氏墓誌銘

毗陵錢公餗公謹公輔公儀公佐以皇祐六年三月戊
子葬其母永安縣太君蔣氏方是時太君年七十矣公

謹為鄭州新鄭尉公輔為太常丞集賢校理五子者卜
明年之三月壬午祔于皇考府君屯田員外郎贈兵部
員外郎諱治之墓而具書使圖所以昭後世者叙曰蔣
氏常之宜興人世以財傑其鄉而其族人以進士至
大官者太君年二十一歸於錢氏與兵部君致其孝兵
部君沒太君進諸子於學惡衣惡食御之不愠均親嫡
庶有鴈鳩之德終不以貧故使諸子者趨於利以適己
既其子官於朝豐顯矣里巷之士以為太君榮而家人

卒亦不見其喜焉自其嫁至於老中饋之事親之惟謹
自其老至於沒紉縫之勞猶不廢子婦嘗諫止之曰吾
為婦此固其職也子婦化服循其法嗚呼不流於時俗
而樂盡其行已之道窮通榮辱之接乎身而不失其常
心今學士大夫之所難而以女子能之是尤難也女六
人皆有歸孫七人皆幼云銘曰

詩始關雎士莫不知孰能其家內外無違聞豈在多善
成於好於惟夫人孰輔而告婦功之修母道之行宜休

而勸不耄以明紹良配淑式穀爾後勗哉其興以克有
廟

建陽陳夫人墓誌銘

夫人建陽陳氏嫁同縣人余君為繼室余君諱楚有子
四人其二人則夫人之子夫人之少子翼生三歲而余
君卒余氏世大姓也夫人盡其產以仁先母之子而使
翼之四方遊學戒曰往成汝志必力無以吾貧為恤於
是翼年十五蓋在外十二年而後以進士起家為吏歸

見夫人於鄉里方此時夫人閉門窮窶幾無以自存母子相泣閭巷聚觀歎息曰賢哉是母有子食其祿宜也蓋食其子之祿十四年翼尉宿松而夫人年七十八以某年某月卒於宿松之官舍某年某月某日葬宣州宣城縣鳳林鄉竹塘里夫人之子長曰某死矣翼有文學善議論雖久困無所合然一時文人多知之者其卒能追榮夫人乎於其葬臨川王某銘曰

在句之陰有幽新宅誰筮葬母瘞銘斯石子閩余姓母

氏惟陳瑯瑯其行婉婉其仁善祿有終名則不泯

李君夫人盛氏墓誌銘

夫人盛氏其先錢塘人曾大父諱某某官贈某官父諱某某官贈某官實始去吳有里籍於汴夫人之幼季父文肅公稱其智曰宜以某字遂名之年二十三歸隴西李某為某官以後生三男子皆進士某某官其季曰某女子四人其長嫁某官某次嫁某官某處者其季也春秋若干先李君卒卒於寧海之官舍卒之某年葬某所

實皇祐四年夫人事舅姑以孝聞持喪哀懼事齋飭卑
衣食以其餘推親黨能讀易論語孝經諸子之書親以
教子子男女娶嫁必問賢否有挾貴以請者李君輒不
聽維夫人有助云銘曰

夫人之德順慎明祇來胥有家婦子師師維師之難我
敏為之誰為女史視此銘辭

金太君徐氏墓誌銘

夫人天性篤於孝謹女工婦事不懈以敏恭儉有節仁

於宗族故以事其舅而順以相其君子而宜以臨其子
孫而治以有賢子大其家室其享諸福終于壽考銘曰
婉婉女工彼徐之子來嬪金宗有衍其始鄙人大家相
望而有誰則無父無姑無母帝嘉汝子服位在朝賜邑
用書象首錦囊孝祗順慈俯仰皆宜考終榮祿於慶有
施偉歟夫人叶此銘詩

楚國太夫人陳氏墓誌銘

夫人陳氏故鎮安軍節度使檢校太師同中書門下平

章事贈太師中書令兼尚書令定國文簡程公諱琳之妻也陳氏世家壽春其先潁川人漢太丘長寔之後也夫人曾皇考諱調左班殿直皇祖考諱誨皇考諱京皆不仕而皇考愛賢夫人不欲以妻鄉邑乃徙居京師擇所居得定公以嫁當是夫人年十九定公尚為進士其後公至將相終于位夫人用公自臨潁縣君九封而為衛國夫人用公子加號陳國夫人再封而得楚國夫人莊而仁儉而禮上承下御無不得宜故在父母家為淑

女既嫁為令妻其卒有子為賢母公薨六年當嘉祐七年夫人年七十一以十一月戊午薨于開封武成坊之第室至明年二月甲申而公子以夫人祔于河南伊闕縣神陰鄉定公之墓於是公子四人嗣隆為尚書屯田員外郎嗣弼為國子博士嗣恭為尚書屯田員外郎嗣先為大理寺丞女子五人公壻榮諲為尚書刑部郎中韓縝為侍御史晁仲綽為尚書屯田郎中潘士龍為殿中丞王偁為試將作監主簿銘曰

程公克壯萬夫所嚮奮功發名乃取將相云誰公配媯
姓氏陳文武自出太姬之孫歸佐休顯自公初屯序厯
爵邑為君夫人公既樹纛以相為伯帝曰哿矣夫人好
德能勸其夫使有嘉績往以朕命賜封大國出書五色
珎首金葩褒之重錦來告于家有豫不怠有盈不侈致
好內外具宜福履侔仁鳴鳩以母諸子歲時振振為壽
在廷手笏腰章亦有公甥維子之才而甥又獻維貴維
富而兼壽善嗟此婉婉考終得願作詩并藏為識新寔

寧國縣太君樂氏墓誌銘

尚書屯田員外郎通判河南府西京留守司事陳君諱

見素之夫人樂氏太常博士諱黃裳之子尚書職方員

外郎直史館贈尚書兵部侍郎諱史之孫而贈尚書刑

部郎中諱璋之曾孫也其先自京兆遷江南為臨川人

至李氏國除而史館君歸仕於皇朝子孫多顯者於是

又遷其家為河南人焉夫人以祥符八年歸嬪陳氏封

萬年縣君又以其子封寧國縣太君年七十五以嘉祐

八年二月辛巳卒于京師卜以三月丙寅祔葬河南唐興鄉屯田君之墓於是夫人之子男三人其一人為太常博士集賢校理其一人為秘書丞集賢校理其一人為祕書省著作佐郎開封府戶曹參軍女子六人存者三人皆已嫁諸孫男女十九人曾孫一人尚幼也夫人少知讀書能略識其大指微諫數當故博士君特愛而賢之欲有所為多與之謀及歸陳氏不逮養皇姑矣屯田君二弟皆尚幼也夫人鞠視如己子出奩中物以助施

族人游士之貧者蓋其家蕭然也而無愠色治諸子有節法誨厲教督造次必於文學故諸子皆以藝自奮名稱一時以至諸孫亦多有為善士先人與屯田君皆祥符八年進士昆弟又與夫人子為同年友故其葬來屬以銘銘曰

夫人既嚴兮又順以祥來配君子兮是生三良以才自致兮名聲之揚慶暨諸孫兮學問文章象服命書兮寵祿方將氣寬天游兮體魄在牀往營新宮兮寢洛之陽

作詩幽石兮示後無疆

仙居縣太君魏氏墓誌銘

臨川王某曰俗之壞久矣自學士大夫多不能終其節
況女子乎當是時仙居縣太君魏氏抱數歲之孤專屋
而閤居躬為桑麻以取衣食窮苦困阨久矣而無變志
卒就其子以能有家受封于朝而為里賢母嗚呼其可
銘也於其葬為序而銘焉序曰魏氏其先江寧人太君
之曾祖諱某光祿寺卿祖諱某池州刺史考諱某太子

諭德皆江南李氏時也李氏國除而諭德易名居中退
居於常州以太君為賢而選所嫁得江陰沈君諱某曰
此可以與吾女矣於是時太君年十九歸沈氏歸十年
生兩子而沈君以進士甲科為廣德君判官以卒太君
親以詩論語孝經教兩子兩子就外學時數歲耳則已
能誦此三經矣其後子迥為進士子遵為殿中丞知連
州軍州而太君年六十有四以終于州之正寢時皇祐
二年六月庚辰也嘉祐二年十二月庚申兩子葬太君

江陰申港之西懷仁里於是遵為太常博士通判建州
軍州事而沈君贈官至太常博士銘曰

山朝于躋其下惟谷纘我博士夫人之淑其淑維何博
士其家二子翼翼萼跗其華詵詵諸孫其實其葩孰云
其昌其始萌芽皇有顯報曰維在後碩大蕃衍刳牲以
告視銘考施夫人之效

右武衛大將軍黎州刺史世岳故妻安喜縣

君李氏墓誌銘

安喜縣君李氏連州刺史贈太師中書令尚書令繼昌
之曾孫鎮國軍節度使駙馬都尉贈太師中書尚書令
秦國文和公遵勉之孫供備庫使贈安武軍節度使端
憲之子是為皇族右武衛大將軍黎州刺史世岳之妻
溫柔靜恭內外親稱之治平四年年二十五以十一月
二十四日感疾死至二年二月十七日葬河南府永安
縣銘曰

懿懿獻穆下歸以祉有來肅雍施及孫子厥嬪皇宗莫

醜具美噫乎終藏兆此新里

仁壽縣君楊氏墓誌銘

太子中允致仕晉陵孫君貫之之夫人仁壽縣君楊氏
者其先青州千乘人曾祖諱元祖諱從皆不仕父諱霖
為進士數舉不遂初徙其家常州之無錫夫人年十七
歸孫氏舅姑曰吾婦之承我也孝夫曰吾妻之助我也
仁至生子而成為士能賢以有名則又曰吾母之能誨
我也自內外族親以至州里之言則又皆以其舅姑夫

子之言為信嗚呼可謂賢矣夫人生三男子伯曰舜卿
季曰昌言皆早死曰昌齡簽書建康軍節度判官廳公
事治平三年自尚書屯田員外郎召為御史五月十四
日次高郵而夫人卒享年六十四以某月某日葬某縣
某鄉某里銘曰

猗嗟夫人女德之茂中允之妻御史之母孝其舅姑以
順其夫又善教子終成御史官封偕老祿養卒齒歸安
新丘送者空里其哀無窮榮則多已



臨川文集卷九十九

欽定四庫全書會要卷一萬四千七百八十八

集部

臨川文集卷一百

宋 王安石 撰

墓誌

鄞女墓誌銘

太君羅氏墓誌銘

縣君王氏墓誌銘

太君曾氏墓誌銘

夫人吳氏墓誌銘

郡君翟氏墓誌銘

郡君齊氏墓誌銘

郡君劉氏墓誌銘

太君徐氏墓誌銘

縣君陳氏墓誌銘

王夫人墓誌銘

縣君康氏墓誌銘

太君李氏墓誌銘

縣君武氏墓誌銘

夫人李氏墓誌銘

鄆女墓誌銘

鄆女者知鄆縣事臨川王某之女子也慶厯七年四月
壬戌前日出而生明年六月辛巳後日入而死壬午日
出葬崇法院之西北吾女生惠異甚吾固疑其成之難
也噫

仙遊縣太君羅氏墓誌銘

仙遊縣太君羅氏世家南劍州之沙縣祕書少監陳君
諱某之妻比部員外郎儼古田縣尉侃衛尉寺丞佩同
學究出身偉殿中丞偁之母年八十三以某年某月某
甲子卒女一人適張氏孫男女若干人太君有賢行事
皇姑蕭氏順焉諸妣慕其所為後亦皆稱孝婦經紀內
治能勤不懈以至於老少監君行治勞烈稱天下有施
於後世其子孫蕃衍能中其家法皆由太君善相其夫
而能教子陳氏之所以興太君與有力焉銘曰

嗚呼夫人有德有祉婦于嚴姑酒食燕喜乃相君子陳
宗以興乃教衆兒有以賢稱樂其室家以暨孫曾歸然
壽寵宜後之承

壽安縣君王氏墓誌銘

江淮荆湖兩浙制置發運使少府監廣陵孫君之夫人
壽安縣君太原王氏其先自滄州之清池徙河南世有
顯人太府卿諱某者皇曾祖也庫部員外郎贈禮部侍
郎諱某者皇祖也屯田郎中贈吏部侍郎諱某者皇考

也至夫人諸兄亦皆為郎尚書而多以材藝稱當世夫人好讀書善為詩靜專而能謀勤約以有禮吏部君愛之尤而擇所嫁於是少府君為大理評事簽書淮南節度判官廳公事以夫人歸焉皇姑曰自兒有婦內外族人加親而吾食寢甘焉少府君材能為朝廷所信以至休顯其盡心外事不以家為卹者以夫人為之內也嘉祐四年某月某甲子夫人卒年五十三明年某月某甲子葬揚州之天長縣博陵鄉皇姑之兆子男二人某某

女六人一嫁蘇州節度推官毗陵張誨一尚幼四先夫
人卒銘曰

竭竭少府有儀有聲誰相其祁以迄休成維王淑女順
婦慈母內諧尊卑燕及婚友錦韜象軸告命之華序章
爵邑維榮有家方大弗祿以宜寵服嗚呼其徂葬有吉
卜

河東縣太君魯氏墓誌銘

尚書都官員外郎臨川吳君諱某之夫人河東太君南

豐曾氏尚書吏部郎中贈右諫議大夫諱某之子諫議君伉直以擯死而都官君尤孝友忠信鄉里稱為長者夫人於財無所蓄於物無所玩自司馬氏以下史所記世治亂人賢不肖無所不讀蓋其明辨智識當世游談學問知名之士有不能如也雖內外族親之悍強頑鄙者猶知嚴憚其為賢而夫人拊循應接親疎小大皆有禮焉嘉祐三年某月某甲子年七十四終于寢有子四人為祕書丞黃亳州錄事參軍其次蕃蒙魯出也皆進

士而蒙為濠州司戶叅軍於是黃蕃皆已卒為蒙以某
年某月某甲子葬夫人某縣某鄉某所之原某實夫人
之外孫而夫人歸之以其孫者也涕泣而為銘曰

靜專幽閑女子之方閔觀博考乃士之常猗歟夫人學
問明智其德女子其能則士我求于往孰與比齊嗚呼
公父穆伯之妻

曾公夫人吳氏墓誌銘

夫人吳氏太常博士南豐曾君之配世家臨川二十四

歸曾氏三十有五以病終子男三輩年宰女一時博士
方為越州節度推官某年月日乃啓其殯臨川葬南豐
之某地前葬輦謀於宗之長者而請於博士曰夫人事
皇姑萬壽太君承顏色教令一主於順斟酌衣服飲食
盡其力皇姑愛之如已女於大人得輔佐之宜於族人
上下適其分今其葬宜得銘祕之墓中於以永永延夫
人之德無不可者博士曰然乃來求銘夫人固早沒不
及見其存時雖然博士先人行也而又輦於友莫厚焉

於夫人之葬而銘也其何讓銘曰

宋且百年江之南有名世者先焉是為夫人之子葬夫人於此於戲

樂安郡君翟氏墓誌銘

并序

尚書主客員外郎錢塘沈君名扶之夫人翟氏者鄂州節度推官諱希言之子太子左清道率府率致仕諱守序之孫利州葭萌縣令諱令圖之曾孫少則賢孝父母稱之及嫁為婦則舅姑稱之如父母處娣姒能和以有

禮畜妾御能正以有仁閨門雖雖上下順治自皇舅尚書公以才為時用繼以主客及夫人之子而沈氏日大矣夫人之德善亦日以顯內外親皆悅服而歸之以謂其必大享爵祿終於壽考乃以治平三年九月十日卒於京師享年五十七初主客自河北提點刑獄移知明州而長子方領開封府事治有異狀為上所禮以夫人久疾請於上留主客京師詔特聽留以佐三司於是諸名暨治夫人無所不為然終不起始封長安縣君進京

兆樂安二郡君生五男三女男曰開翰林學士右諫議大

夫知制誥曰迴秦州軍事判官曰遼將作監主簿監壽

州酒曰遨漳州漳浦縣主簿曰迨試將作監主簿女適

祕書省著作佐郎顏處恭邢州堯山縣令王子韶太常

博士監察御史裏行蔣之奇翟氏濟州金鄉人商州團

練使守素者當太祖時親信任事族人因多為武吏而

皇考獨好文學舉進士中第負材任氣不肯有所屈以

終不得意夫人之兄嚴亦知名又早卒夫人傷其家替

每獨歎息今上即位翰林守杭州其季舅惟康以奉獻
得仕今為道州寧遠縣主簿夫人既卒詔以主客知蘇
州十二月某日葬夫人杭州錢塘縣龍居山舅姑之兆
銘曰

沈侯世獻得相惟媛歸嬪于宗誨子而彥相之斯何德
則有儀誨之斯何慶則有貽始周姓姬後氏為翟於梁
曰璜實佐其國至漢高陵又以才稱世降弗嗣乃齊女
子許公之妻公武之母昭於銘詩無盛與夷彼暴而興

亦遙其沮我以吾仁其昌孰禦挺挺中丘萬木如茨往
從舅姑協我初龜

高陽郡君齊氏墓誌銘

夫人故翰林侍讀學士贈開府儀同三司王公諱洙之
妻故光祿寺丞力臣今太常寺太祝欽臣祕書省著作
佐郎陟臣祕書省正字曾臣之繼母也齊氏好讀書能
文章有高節美行治平二年年五十五以五月初三日
終于亳州其子之官舍治平三年十月初八日祔葬於

南京虞城縣孟諸鄉田丘里初夫人自哀早孤誓不嫁以養母及公失初妻諸子幼聞夫人賢行求之曰是必能母吾子於是母兄強嫁之及歸果能母諸子聰明而仁恭儉以有禮闔門欣欣無一異言始封縣文安又封郡高陽而公卒即舉家政屬之子婦齋居素服不御酒樂以至沒齒雖時為詩然未嘗以視人及終乃得五十四篇其言高潔曠遠非近世婦人女子之所能為又得遺令一篇令薄葬其言生死之故甚有理齊氏祁州蒲

陰人夫人曾祖諱某故不仕祖諱安故不仕考諱永清
莫州防禦推官兄恢弟憚皆知名公四男一女女嫁尚
書職方員外郎陳安道夫人既善撫諸子而諸子亦多
賢能致孝於葬來求銘銘曰

在冀中山有孝季齊少孤恃母悲不忍離及以義行乃
終順慈顯顯王公學問文章族為大家爵祿寵光來繼
來助其賢則譽銘詩幽宮以告齊終齊終有始自其為
子

同安郡君劉氏墓誌銘

尚書戶部侍郎致仕廬陵王公贇之夫人同縣劉氏女也父諱某祖諱某曾祖諱某三世皆弗仕然常為州大姓方公少時夫人父知公必貴故歸以其子夫人之在父母家既以孝聞及嫁舅姑又稱其孝能相其夫以順又能畜其婦子以慈公當仁宗時以御史見聽用閱天章龍圖樞密三學士夫人亦累封為同安郡君治平四年十一月七日終於廬陵宣化坊之私第有二子儀殿

中丞前死億今為尚書都官員外郎女一人嫁撫州軍
事推官肅迅公之告老詔以億通判本州以養及是喪
夫人能自致焉明年某月某日葬某縣某鄉某里銘曰
於美夫人明祇順飭來嬪王宗時藝其德公榮在朝皇
命所特出使入侍往來赫赫登為大家自我承翼有田
有廬偕老而息亦有孝子媚于朝夕噫乎終哉兆此幽
宅

仁壽縣太君徐氏墓誌銘

夫人徐氏饒州浮梁縣人曾祖諱某某官祖諱某父諱
某皆不仕夫曰尚書屯田郎中金君諱某同縣人也生
子十一人男四人君著君佐君卿君佑皆進士君卿今
為尚書職方員外郎女七人皆適士族孫十九人男六
人女十三人已嫁者十二人曾孫男女十四人外孫四
十七人夫人以職方故封金堂壽安二縣君又封仁壽
縣太君後郎中之沒九年享年七十七卒於池州官舍
實治平三年八月十三日以四年某月某日藏柩于某

鄉某里祔郎中之葬夫人天性篤於孝謹女功婦事不懈以敏躬儉有節仁於宗族故以事其舅姑而順以相其君子而宜以臨其子孫而治以有賢子大其家室具享諸福終于壽考臨川王某銘其葬曰

婉婉女工彼徐之子來嬪金宗有衍其始鄙人大家相望而有誰則無父無姑無母帝嘉汝子服位在朝賜邑用書象首錦囊孝祇順慈俯仰皆宜考終榮祿於慶有施偉歟夫人協此銘詩

永嘉縣君陳氏墓誌銘

陳氏於蘇州為大姓夫人者太子中允諱之武之子某官贈太常卿諱郁之孫左贊善大夫諱質之曾孫而太常博士王君諱逢之妻也聰明順善動有禮灋以不及養舅姑也故於祭祀尤謹博士祿賜盡之宗族朋友不足則出衣服簪珥助之而不言選飾妾御進之不忍然博士終無子蓋吾聞於博士者如此撫博士之兄子如己子哭博士三年未嘗如陳氏除喪大貧顯者求以為

妻族人強之不可又強之則涕泣自誓居頃感疾以死
蓋吾聞於博士之兄子景元者如此然夫人之行非特
出於二人之言凡習陳氏王氏者皆知其為賢而哀其
志其封曰永嘉縣君其卒於蘇州以治平二年十一月
九日年三十八其葬以三年十一月某日從博士於閭
門之西原銘曰

穀也從於此罋也隨以死歸義與命奚傷乎無子
王夫人墓誌銘

右侍禁知循州興寧縣事海陵周君諱彥先之夫人王氏我叔祖尚書主客郎中贈右諫議大夫諱貫之之子年二十三嫁周氏嫁六年生一子澥而周君卒後十八年子濤為祕書省著作佐郎知汝州梁縣事而夫人年四十八以疾棄世於梁縣子濤等護其喪歸以嘉祐四年十一月二十九日庚申葬海陵城北之兆夫人心莊而行厲氣和而色婉撫接內外親疏皆有恩意而於人終身不校嗚呼其賢如此銘曰

於嗟夫人少憫憂祇專靜嘉好衆仇克協婦子祠春秋
方胥有家裕厥羞不永于享其何尤序哀以銘款諸幽
右監門衛大將軍世耀故妻仁壽縣君康氏

墓誌銘

皇族右監門大將軍世耀之妻康氏故內殿崇班閤門
祇候遵度之子祖曰廷翰皇任磁州防禦使曾祖曰碩
皇贈左千牛衛大將軍以嘉祐三年為宗婦封仁壽縣
君生一子令優為右千牛衛將軍而以熙寧元年六月

九日疾病死享年二十有六自為女子以至於為母卑尊幼長無所非議故於其死皆哀憐二年二月十七日葬河南永安銘曰

芒乎其孰致而來奄乎其孰推而往為之幽宮覆以新壤魂浮氣游變化惚恍宛其德音尚可追想

壽安縣太君李氏墓誌銘

新喻蕭渤狀其母授息總使來求銘以葬惟夫人姓李氏於邑里實大姓曾祖諱某祖諱某考諱某皆弗仕而

曾祖以其孫憲成公故贈官至太子太師夫人柔順靜
專仰俯有儀年十有五而嫁是為鼎州團練推官蕭君
諱蕢之妻年二十有二生渤淇澈三男一女子而寡執
節不嫁父母欲奪之不得卒就其男宦學歸其女為士
妻孫曾詵詵饋祀裕如鄉人歸高稱諺歎息治平三年
渤用尚書駕部員外郎選主廣濟河漕而夫人年六十
有八以九月八日卒于東都之私寢越明年某月十有
一日合葬新喻某鄉某里於是推官君以渤故贈右諫

議大夫夫人封壽安縣太君銘曰

有幽新宮在阜之陽慶既造家乃終同藏共伯之妻文伯之母於嘉夫人亦緒厥後磨石攜丹詒銘永久

右千牛衛將軍仲焉故妻永嘉縣君武氏墓

誌銘

皇族右千牛衛將軍仲焉之妻故永嘉縣君武氏內殿崇班掖之子故左班殿直昭遜之孫贈尚書工部侍郎崇亮之曾孫年十八以熙寧元年十二月十四日棄世

以明年二月十七日葬河南永安縣君在襁褓父母以
為婉及嫁節儉慈仁人稱之銘曰

象服之粲兮容車之晚兮歸于陵波哀歌以相挽兮攜
銘壙石識幽以告遠兮

鄭公夫人李氏墓誌銘

尚書祠部郎中贈戶部侍郎安陸鄭公諱紆之夫人追
封汝南郡太君李氏者尚書駕部郎中贈衛尉卿文蔚
之子也光州仙居縣令贈工部員外郎諱岵之孫以祥

符九年嫁至天聖九年年三十二以八月壬辰卒於其夫為安州應城縣主簿之時後三十七年為熙寧元年八月庚申祔於其夫安陸太平鄉進賢里之墓於是夫兩子獮為祕書丞知潭州攸縣解為翰林學士尚書兵部員外郎知制誥一女子嫁郊社齋郎張蒙山夫人敏於德詳於禮事皇姑稱孝內諧外附上下裕如鄭公大姓嘗以其富主四方之游士至侍郎則始貧而專於學夫人又故富家盡其資以助賓祭補紉澣濯饁饗朝

夕人有不任其勞苦夫人歡終日如未嘗貧故侍郎亦
以自安於困約之時如未嘗富鄭氏蓋將日顯矣而夫
人不及其顯祿嗚呼良可悲也於其葬臨川人王某為
銘曰

於嗟夫人歸孔昭兮窈其為德婉有儀兮命云如何壯
則姜兮烝烝令子悲慕思兮有嚴葬祔祭配祗兮告哀
無窮銘此詩兮


臨川文集卷一百

謹案卷九十八第十七頁後二行四年改右武衛

大將軍刊本脫年字今增

欽定四庫全書





總校官庶吉士臣張能照

校對官檢討臣龔大萬

謄錄監生臣劉鳳樞